

道先元年辛巳
秋九月開雕



道先元年辛巳
秋九月開雕



蘊懷閣詩文全集總序



吾師子履先生以著述名海內者三十餘年香之執經於先生者閱十數年於茲矣先生幼稟瑰異之質好深湛之思長而修學好古發爲文辭鑱刻隱隙揚權麗藻東南壇坵羣推大宗屢試春官與長安士大夫掎裳聯襪傳觴授簡縞紵之交敦盤之會文盟定霸衆賓翕然旣而倦游戢影司鐸吾邑澹榮進之心做待叩之教考德問業弟子著錄者日益衆雖檮昧如香亦得晨夕賞析親授義法正其塗徑示以準繩蓋深知立言之難而欲上尋墜緒下待來者此先生起衰振靡懃懃懇懇至老不勗之苦心也先生所著詩文集皆手自釐訂少作壯悔裁汰甚嚴集外諸作

爲藝林傳誦者意稍未愜真不復錄卽集中所存猶歛然自視恐不得進於古作者之林道愈高心愈下才力愈厚而學養愈醇香雖不足以窺涯涘然海內論著述者讀先生集當不以爲阿私所好也集凡如干卷香皆得與讐校先生長君徵璵字小雲負異才爲名諸生溺苦於學賚志早逝今以遺藁附於集後蓋仿曝書亭之有笛漁也道光十有二年春二月山陽受業李續香謹序

蘊縈閣詩集序

曩者胡君蛟門亟稱邑中有盛孝廉子履者英絕領袖之士也余乃介於蛟門而與之游見其爲人溫雅雋朗有袁彥伯崔長孺風致且工於詩旣而蛟門遽返道山余補官北上遇子履於長安邸舍因延館余家每當樞庭散直之暇輒翦燈煖酒日以唱酬爲懽及子履下第南歸余亦持節嶺外曾以書招之虞山之麓苦道遠弗得達虞山其舊遊地也故集中所載山水懷人諸作惟虞山爲多余與子履相睽久矣昨從虞山來慰我於銜恤堊廬之下握手涕泣不暇問其詩境之何若也暨公車歷碌又不得志而還始出其蘊縈閣詩集見示余讀其近年所著詩覺體格遞

變而所造益工夫以十年之間倏往倏來忽聚忽散而鄉里一二知心半皆彫謝則詩之於人也亦等諸雲煙過眼而已矣夫詩之爲道曰情曰辭辭有升降情則千古勿之有改子履之詩深於情而富於辭故能深婉豪健兼擅其長其追金琢玉璀璨瑰麗則才人之詩也其含吐抑揚醞釀深厚則詩人之詩也余學詩三十年茫無所得卽偶有所得僅止於此然後知詩非易爲也不造微不足以名家故唐人盡一生之力爲之以子履之性癖耽詩極其歲月詣力當必有斲輪於甘苦之外而卓然成一家者余安能量其所到哉子履贈人詩不云乎浮生碌碌盡似鴻毛輕吾儕終當爭此身後千秋名亦可以觀其志之所在矣

嘉慶甲戌冬至日同里汪彥博書於養泉齋

余與子履聚而復別別而復聚者蓋十餘年於茲矣猶憶京邸初晤時諸同人皆揣摹制舉日不暇給子履獨鎮日高歌客有談及俗學者子履卽掩耳疾走蓋其天性超曠視榮利如敝屣雖屢赴都門意在於尋詩而不在於科第也夫千古推爲詩聖者莫如杜少陵而善學杜陵者莫如元遺山今子履出入百家而其大旨則以杜陵爲祖以遺山爲宗凡動息勞佚悲歡離合感時觸事一寓於詩讀之可以知其性情之正矣古人云詩須得江山之助又必讀破萬卷延覽才俊以擴其見聞子履才分過人博通羣籍尤長於史學中年以後往來南北數千里齊魯燕趙吳越

之間所與遊者皆海內諸名士所見愈濶詩境愈高能含老氣於秀色之中能發逸情於埃簡之外沉雄激越跌宕淋漓斷非世俗之研揣聲病者所能測其津涯窺其堂奧也余之序子履詩以嘉慶壬申而止其癸酉以後藁彼時尚未之見僅執前序以例君詩猶未足以盡君詩之妙也因不辭蕪拙而更贅數語嘉慶戊寅夏五汪彥博書於京寓之藤花館

予童子時卽識先生之爲人稍長讀先生詩文襍著益眊沫不能已其時先生之詩近體學西崑古體學長慶如時華美女珊瑚木難鮮新華曜爲一時流輩所推挹後十餘年先生旣奔走於衣食而予亦時時去家不數見見則詢

近狀匆匆別去未嘗一言及於詩甲戌計偕至京與先生同寓宣南旅舍因得盡讀先生之詩其氣盤薄鬱積蝨蝻葵蕤觀者徒禡魂眩目莫得畔岸其辭則連犴譎詭縱恣自喜出入於昌黎昌谷而時委迤於歐梅范陸間始嘆先生之得於此者深而舊日之風華綺麗所知於先生者非其至也旋里後先生依觀察使何公於浙中縱游浙東西諸名勝是時余在吳門又不得繼見者二年往歲始相約北行途中抵掌譚藝宿願畢償每一登覽則長篇短歌累贈互答渡河而北晤畢子筠於下邳同登兗州南樓遂至曲阜觀孔子廟堂車服禮器悠然見三代文章禮樂之遺意先生作紀游詩數篇皆沉深豪宕卓然自爲一家聆其

議論則以青蓮少陵昌黎遺山爲宗而追逐於建安黃初而上視其篋中舊作已刪去十之六七所存詩若干卷皆刊落浮華不屑屑於摹擬刻畫而淳古雄厚自然深造蓋其沉潛反復用力於此者三十年然後知其得之難而益信其傳之者久也且夫河之出於蔥嶺也紆迴漩折數萬里而放乎海木之生於豫章也雨淋日炙數百年而成乎材文章亦然鏗而不舍積而不可止則其發之言也愈光而行益遠近代詩人或衍江河之末派而以爲不關才學獨榮性靈或揚王李之頽波則又欲割剝古書務爲奇崛其故在汲汲以獵時譽而未嘗求之於古人根柢之所在也然則讀先生之詩者其亦可以審所用力矣抑又有進

焉者神明之律與情志通先生貌和而性峻與俗士遇去之惟恐若晚年近五十連不得志於有司胸中曠然曾不芥蒂自文章著述而外別無可以移所好者此豈無所得而能然耶予與先生俱客京師昕夕相過從登臨俛仰時以詠歌遣懷先生過以予爲知言而予亦似有所得遂忘其性繆牽綴而爲斯言同里徐元潤

議論則以青蓮少陵昌黎遺山爲宗而追逐於建安黃初而上視其篋中舊作已刪去十之六七所存詩若干卷皆刊落浮華不屑屑於摹擬刻畫而淳古雄厚自然深造益其沉潛反復用力於此者三十年然後知其得之難而益信其傳之者久也且夫河之出於蔥嶺也紆迴漩折數萬里而放乎海木之生於豫章也雨淋日炙數百年而成乎材文章亦然鏗而不舍積而不可止則其發之言也愈光而行益遠近代詩人或衍江河之末派而以爲不關才學獨榮性靈或揚王李之頽波則又欲割剝古書務爲奇崛其故在汲汲以獵時譽而未嘗求之於古人根柢之所在也然則讀先生之詩者其亦可以審所用力矣抑又有進

焉者神明之律與情志通先生貌和而性峻與俗士遇去之惟恐若晚年近五十連不得志於有司胸中曠然曾不芥蒂自文章著述而外別無可以移所好者此豈無所得而能然耶予與先生俱客京師昕夕相過從登臨俛仰時以詠歌遣懷先生過以予爲知言而予亦似有所得遂忘其性繆牽綴而爲斯言同里徐元潤

蘊愫閣詩集自序

余年十一二時隨先君子讀書里塾日間課經夜則授以作詩義法所選漢魏樂府暨六朝唐宋人詩必令熟讀至漏下三鼓始就寢少長習制舉業功遂間斷及浮沈諸生中見所恃爲科名羔雁者心竊厭棄始發憤肆力於古今體詩時青浦王述庵先生主講婁東書院余以詩進質先生見而竒之謂異日大有造就益喜不自勝欲併力與古人相追逐乃家累叢積鮮民在疚煢影孑立中心盡傷茫茫百感湖海浪遊及戢影淮壖年已五十矣家庭多故朋舊凋謝每撫今悼往侘傺無聊有所感觸輒見之於歌詠而意旨所向辭不盡宣則以少壯時學詩之功作輟無常

或奪於浮名或困於衣食是以精神耗敝而卒無所成也
然而數十年來情性之所寄託蹤跡之所涉歷與夫交遊
親故盛衰聚散之感無不具乎其中則余之所作雖不足
傳而覽者猶得因其詩而悲其遇焉區區一編所由竊自
愛惜而不忍焚棄也鎮洋盛大士自識

蘊懔閣詩集題辭

一鞭席帽纔拂了輭紅塵土看文杏雲邊碧桃天上愁絕
芙蓉江渚莫問春卿遺才事只湘水衡山鑒取嗟十指朱
絃七條冷玉有人心許 千古錦囊畱得綠章佳句記吾
谷花濃尙湖杯暖傳遍旗亭歌處穎士奴憐香山媪解儂
也兩眉軒舞暢好約海上成連日日刺船聽去

右調十二郎

嘉慶甲戌九秋同里甘亭居士彭兆蓀題于小謨觴館

盛子婁東豪風騷追古作精思溟滓穿靈境雲霧霽鯤鯨
巨艦摩雕隼勁弦落道如禰三搥堅比季一諾豔疑錦裁
囊質若布張橐營嗚洪鐘撞醴粹醇醴酌才多轉不矜律
細妙難縛念君鄉關居高閣鎮垂箔嗜古焉辭貪讐書自
忘虐林端無妄花檐際有馴雀佳兒夜聯吟好友日行樂
竭來人海藏作歌猶憶昨故交彭甘亭與汪厚夫詩壇九
州拓君於二子間戰並萬人却栖栖感離羣杳杳悵歸約
善保衣中珠恐遭路旁愕大雅誰扶持此道足嗚噓江湖
窈然深滄海日以涸我慚不鳴雁君類避羣鶴瑤華肯見
貽朗誦間宵柝千秋名山藏半世扁輪鑿撲彼十丈塵凜
此徑寸鏗開編目刮鏗揜卷耳鳴鐸報章勿嫌遲沈吟再

三索

嘉慶己卯仲春題蘊懷閣詩集卽用寓齋雪夜與子履孝
廉小飲限十藥韻嘉善黃安濤

蘊懷閣詩集總目

卷第一 癸丑至
己未

古今體詩七十五首

卷第二 庚申至
甲子

古今體詩六十九首

卷第三 乙丑至
丁卯

古今體詩五十四首

卷第四 戊辰至
己巳

古今體詩七十三首

卷第五 己巳至
壬申

古今體詩五十八首

卷第六 癸酉至甲戌

古今體詩七十五首

卷第七 乙亥

古今體詩七十八首

卷第八 丙子

古今體詩七十三首

卷第九 丁丑

古今體詩八十四首

卷第十 戊寅

古今體詩八十二首

卷第十一 己卯

古今體詩五十四首

卷第十二 庚辰

古今體詩七十一首

蘊懷閣詩集卷第一

癸丑

城南草堂雜詩

鎮洋 盛大士 子履

敝廬城之南地僻寡輪鞅農祥發土脉環舍多沃壤新畬
序錢鏹筐筥載黍饒宵則荷月鉏晨或戴星往三時偶娛
嬉百穀曷蕃穰心苗益春和元氣浩然養

東鄰數畝田汗萊半荒蕪官租不足償吏胥暮追呼售與
西鄰家磽者為膏腴豈係地氣變勤惰人力殊霜風杭稻
熟落杵飄紅稔樂康無已太有酒消幾壺青陽轉地脉新
綠開春郭

蘇轍詩集卷第一
實學建功業俗學驚名利心跡真偽分學術今古異聖賢
勤詩書匪爲温飽計朝廷詔賢良所重在經濟辭賦技瓊
屑雕蟲壯夫棄抱膝卧空山側身小天地

朔風逐霏雨入夜變作雪觀書坐拳足敗絮重似鐵茗鑪
撥殘灰炙手不知熱此時窮巷子炊煙或斷絕妻孥夜卧
薪晝起擁鶉結一袍不蔽體何以禦栗烈

中庭古槐樹有鳥巢其巔罡風摧林柯下上飛盤旋熒影
失所託哀鳴劇可憐皇天本至仁怙冒無頗偏覆載猶有
憾何以謀萬全富者粟比櫛貧者室磬懸安得惇獨民畀
以百晦田廬井傳子孫永世保幹年

秋日遊梵鐘禪院

海天青不斷秋色上層樓落日澹沉雁迴風寒聚鷗榆黃
城堞迴竹翠寺門幽晚聽蒲牢吼驚濤起石湫

潮音庵

蘭若東南勝滄江萬象清竹風吹海氣松月瀉潮聲徑僻
多花草僧閒少送迎客歸尋舊路樵舍一燈明

秋感十二首

秋心抱寒月流光入虛幃却照孤坐影鐙前雨依依靜居
契恬尚迴與世事違觀書證心得理解涵精微欲求今者
是須辨昔者非夢游太空際天風掃陰霏河漢不可渡白
雲自孤飛

寂寂四山暮啾啾百鳥哀木葉自黃落匪爲秋風摧金柔

蘇轍詩集卷第一
火易爍石爛山易隕奚况蒲柳姿歲月能幾回吾將挽羲
鞭良晨暫徘徊有酒且歡飲浩歌臨高臺

秋山澹於墨不辨雲有無中藏萬壑松高下相盤紆態遠
意若近骨瘦神彌腴開軒豁吟眸筇杖欣相扶羣鳧水中
聚一雁天邊孤物情各有托亮茲族類殊吾其審所與曠
懷斯人徒

山雨浥曉潤溪雲迴晚晴草色青可憐一掬綠不盈傷彼
病黃蝶依依戀寒英三春桃李花一歲不再榮秋容獨婉
變慰此幽人情

雞鳴風雨夕秋思淒以苦良人會面稀一水千山阻衆芳
嘆將蕪及時采蘅杜却恐濶絕久兩情不相許中宵起徘

徊停琴悄無語

索居意不愜乃作西溪遊西溪有故人共此滄江秋擁書
坐日暮山翠空中浮回頭見飛鳥翩其下林邱銜來一紅
葉葉底斜陽留頓悟靜者靜相賞幽居幽勞生困塵鞅役
役奚所求

蟋蟀草間蟲能識秋氣悲夜長生客愁唧唧鳴孤帷冷夢
已如水更縈醒後思多情謝明月夜夜照階墀

南山榆葉黃北山楓樹紫叢竹青四時杳入碧雲裏登高
發浩想羨彼古無死朔風吹短髮撩亂不能理身無鷓鴣風
翼何能舉千里

墓門生重陰夕露泣百草劉伶本酒徒一醉不知曉愁人

抱酒悲盛年容已槁垂死含苦辛奄忽不自保放曠聊復
爾憂傷令人老惟此不朽業修名古所寶

絲管皆春聲彈琴秋最宜秋意入琴趣尤在夜靜時松聲
古澗落竹影疎簾垂瀟湘煙水濶君行何所之碧天美人
夢惟有明月知

艾草不盈寸能滅蘭蕙香浮雲薄於縠能掩星河光凜凜
物候晚感感增感傷池流未成冰簷瓦已着霜陰陽迭消
長備患宜周防

仗劍出門去四顧天蒼茫落日澹寒楓驚颺起枯桑前有
百丈淵欲渡愁無梁峻坂不可上猛虎深林藏平地亦險
阻矰繳滿路旁野田飛黃雀所志在稻梁鴻鵠殊冥冥千

里任翱翔

甲寅

春郊晚歸

晨起愜勝覽晚歸日已冥岍容低野樹城影落春星小艇
喧爭渡荒庵靜掩扃吟懷何處托笛韻幾回聽

先大父維閭公幼精醫理樂善好施至老不倦乾隆二十
年里中大疫郡守王公設局延聘治疾全活無算迄今城南
故老猶有能詳言之者敬賦此詩以誌先人之世澤於不衰

我祖清芬遠百年舊澤深布衣壽世業宰相活人心邑乘
名垂昔州民感到今春陽回大化秋癘掃重陰效自收操

券貧還却贈金不辭昏暮叩遑避雨風侵舍北泉流并城南杏滿林梓桑敦厚誼松菊動高吟殘帙刊魚魯遺編走蠹蟬濟時留妙術裕後仰貽箴故里無喬木荒阡有暮禽禁方三十卷零落涕霑襟

苦雨

海氣荒城六月寒愁雲苦霧望漫漫高原陡落千山澗平地爭迴百丈瀾把釣翻耽漁隱樂典衣聊辦腐儒餐汗田灑徧農人淚后土何時得再乾

家大人命詠閒居得秋字

世外溪山夢裏遊醒來身事類浮漚放懷湖海煙波濶寓目田園景物幽隙地有花堪破寂虛堂無月自生秋寒墮

故物吾家在隨分蓋鹽莫浪求

過黃姑塘織女廟

渡頭古廟晚涼生隱約前村牧笛聲小雨乍過雲半卷疎星還在水邊明

十丈紅牆斷復連平橋流水漾澄鮮滄江舊約尋詩伴記別天孫又一年

溪南晚眺和楊樗莊丈樂韻

平野渺無際蒼茫眼界寬沙隨孤雁沒秋入片雲寒古渡歸漁艇斜陽落釣竿村家招客憩澆渴酒頻乾

聞海上有警

怪雨腥風咽怒潮盧循戰艦勢方驕樓臺蛟蜃迷羣峽草

木蟲沙走百妖但使恩威能並用可知氛祲不難消東南
比戶愁征調佑舶江干嘆寂寥

海寧寺設粥歌爲于滄來郡守鼇圖作

海寧寺在城西日慘慘風淒淒朝聞婦女哭暮聞嬰兒啼
抱布易粟者誰子一飽不救全家飢入城來行躑躅出城
去歸家速走告家人且勿哭明日城中設官粥譙樓四鼓
城門開使君騶從街前來夾道羣隨使君走挈榼提筐萬
千口懽呼老穉滿路衢仰視使君淚落如連珠冰天雪夜
寒威凜使君有酒不能飲明春二麥綠滿疇使君出郊四
眺一醉可以消千愁

京口舟次

曉發鐵甕城城頭日初吐嵐開千樹雲澗瀉前宵雨蘋花
媚溶漾鷗羣逐三五挂席望青山歸心入秋浦翻思渡江
來幾日風波阻沙邊邀酒羣蘆中答漁父欲爲黃鵠飛短
翮不能舉百里嗟沉滯何論遠行苦

秋望

江天涵遠碧爽氣入秋晴竹外一山影松間萬壑聲閒鷗
浮水狎獨鶴御風行正欲攬高詠舉頭明月生

謝臯羽竹如意歌

匡山鬼兵夜深哭血染千竿萬竿竹道人晞髮陽之阿斬
竹刻釵歌楚歌一枝枯竹擊石碎杜宇冬青月昏晦朱鳥
飛下嚴陵臺忠臣不死魂復來故人酌酒荒亭下秋篁綠

暗鮫珠瀉斷竹續竹啼烏鳶柴市草花青可憐

湯貞女詩

有引

湯貞女嘉定薛涇人許嫁同里王

謙益

未嫁而夫卒貞女

往殮號泣如不欲生比還晝夜哭不飲食遂病病且殆語
父母曰兒死請葬王氏墓父母許之有頃卒訃於夫家舅
姑痛悼迎匱合葬小婁塘之原實乾隆九年九月某日事
也

謙益

有從子

濤

嘗述其事於余余爲作詩以紀之

迢迢薛涇水百尺激寒漪湯氏有好女窈窕神僊姿山陰
貴家胄占協家人宜未裁合歡被條悼孤鸞離上堂拜父
母嗚咽紛涕洟夫君殮某日願往一視之出門登車去眯
目揚塵緇到門拜舅姑舅姑心愴悲昔日麩餅會紅錦鋪

儷皮今日泣瓊瑰總帳搖靈旗人家新嬾至騶從香輪馳
紅紗封玉臂蘭麝添衿襦嗟我新嬾來素輦曳縞綦一見
新嬾面引我心淒其新嬾聞此言不語涕漣洏擗踊視含
玉觀者長吁嘻比歸晝夜哭不知渴與飢從此嬰痼疾勢
若孤線危阿母心旁皇旦夕慮不支中夜三四起正值彌
留時問女欲何言問女欲何爲牀頭謝阿母永與大人辭
自兒生母家不逐兒童嬉大人甚憐愛賜我碧玉卮玉卮
光的皜彩奪明玻璃紅紋細生鱗隱約蟠雙螭薰以龍腦
香供以鳳尾芝覆以流珠盤盛以鬱金醅願言酌郎墓百
和燔松脂生來不識面地下長相思耐葬郎墓旁兒死心
亦怡返魂無竒香莫挽乘雲輜舅姑驚聞訃窀穸爲親治

迎匱謀合葬合葬婁塘隱婁塘水潺湲豐艸綠滿陂矢志
貫金石終古留殘碑

乙卯

江村

江村三日雨野水一篙平夾岸楊柳綠滿林春鳥鳴偶尋
高士宅獨傷青溪行可望不可卽悠然移我情

過田家

攜筇過南陌閒叩田家扉繞屋樹交蔭到門花亂飛佐觴
銀線潔舉筋鱖魚肥日暮歸途晚清風冷葛衣

古意

明月照儂影金鏡照儂面鏡比月多情令儂常自見

子夜歌

歡言夜未央儂恨天將曙明月照歡來殘星送歡去
歡似簷上燕去來無定期今夜歡去早昨夜歡來遲

王孫遊

櫻桃紅欲綻楊柳綠垂絲芳草雖云歇君歸猶未遲

休洗紅二章

休洗紅洗多紅色改舊紅日棄遺新紅爭鬪彩人情厭故
競喜新故人昔亦爲新人

休洗紅洗紅紅頓濕落紅隨逝波入水紅難拾一水分作
東西流別時紅顏今白頭

積雨書懷

日日重雲罨水隈溪聲爭挾雨聲來却看絕壑通舟楫卽
恐汗田沒草萊澤國鶯花原綺麗江鄉鴻雁足矜哀柴扃
寂寞黃昏後愁對簷鐙泛綠醅

丙辰

早春遊璜溪集飲顧硯虹茂才昌緒齋中

小艇東風遊興催故人喜我抱琴來春塘十里水初漲薄
雪半林花欲開雄逞談鋒銷短燭苦搜詩思吸殘杯明朝
溪口別君去折取一枝綠萼梅

寶劍篇

扶桑日射鼇山紅后羿不敢彎強弓八方精氣聚一處洪
鑪九轉鎔精銅豐城石函歲月古誰致華陰一囊土血痕

繡澀苔花封尙有虬龍赤霄舞掣電流星閶闔排雲涌
現金銀臺飛廉扇炭寶光吐不使神物埋蒿萊卽今殺氣
連秦蜀白晝殤魂向人哭陰厓萬樹刀兵聲淚竹愁花慘
心目軍門奏凱夾道呼左提純鉤右湛盧斫取雌虺擒雄
狐大排蘭綺錦繡鋪鐵甲照耀紅珊瑚

書感

古者男子生門設弧矢六春秋數干戈武事幼習熟奈何
今之人韜畧不寓日文武分兩途書生半庸碌我慕小戎
詩君子溫如玉騏驎駕六轡勒環耀五綵傳聞荆楚寇鋌
險竄秦蜀願隨羽林軍馘獻戎醜速

哭姊氏

慈顏髻髻背煢影泣昏晨况復寡兄弟同君歷苦辛出閨
爲健嬾中歲作陳人未忍除喪服臨風獨愴神

呈王少司寇述庵先生

海內文章伯江東大道王雅輪扶隻手古殿歸靈光道洽
中朝望身逢景祚昌晚歸耽著述舒嘯泖湖莊

絕域南荒微書生遇合竒棄繻關路迴磨盾羽書馳瘴癘
消皮骨星霜感髣絲斗狼箐萬里名氏勒韓碑

從軍班定遠投筆竟封侯事業輝青史功名半白頭九天

隆迪簡元老倚襄猷

謂阿文成公

郊勞臺高築刀鏃夜月秋

寰海鋒煙息旌麾昇任專旅葵歸職貢召虎効旬宣錫
命邀殊寵安車禮大賢昔年疏廣受盛事到今傳

車馬江干駐騷壇屬九峯星瀾迴學海山斗仰儒宗千叟

天厨賚三春帝澤濃神仙挺鸞鶴未改舊時容

答柬錢同人茂才

伺

乍合延津劍龍門快並登

君與余同受業於述庵先生之門

酒懷爭跌宕

流輩已飛騰詩補昔年稿寒消半夜鐙秦中頻報警閒坐
百憂增

遣悶

中澤哀鴻日夜鳴閉門風雨百愁生文章聊遣窮居悶懷
抱空憑濁酒傾近水落花迷客櫂遠天飛絮失春城東南
租賦征輸急聞道秦川正用兵

黃塵苦霧盡妖氛閣道褒斜壓陣雲盪寇兵曾疲百戰總

蘇轍詩集卷之一
十一
戎威自震三軍臨邊王縉新持節開府哥舒舊策勲聚米
畫沙歸 廟算侈談韜畧笑紛紜

蟻聚蜂屯勢蔓延撫循悔失事機先將軍灞上真兒戲野
老江頭欲涕漣戎馬關山須努力征衣風雪又經年何堪
落日高原望巫峽猿啼絕可憐

滄江風月獨登樓野色蒼茫攪客愁已見旌旗連漢廣又
傳烽燧到中州承平武備疎羣牧社稷元勲仗老謀莫笑
空言無寸補書生還切杞人憂

丁巳

二月四日陸茂才

錫瑞

招飲城西別墅對雪分得

紅字

春江吹盡梅花風欲雨不雨天濛濛城西陸子頗愛客凍
醪酌對花惺忪螺卮浮甘鴈壺覆飭盤鮭菜烹葵菘開門
豔雪千萬片世界恍入冰壺中朱簾初卷篆煙碧綠酒自
照簷鏗紅太空不留一點滓大斗足洗千秋胸酣歌頓令
寒意破但覺春氣含冲融君詩翩如舞蛺蝶點綴巧奪滕
王工玉殿銀臺路幾重美人遙在蓬萊宮東方漸高日初
吐青山更有嫣然容

春雲曲

春雲開曉紅半天璿臺玉洞花翩翩美人隔花玉齒笑捧
出行波宮樣賤雲鬟綽約珮寶璐層樓圍繞珊瑚樹縹緲
羅浮蝴蝶衣玉鉤靜鎖留春住昨宵我夢游天台飛泉寒

翠流石苔虹梁架空一千丈涌現紺碧金銀臺倚雲灌僊
露瑤草玲瓏栽披雲散香霧羅帳葳蕤開醒來日出樽桑
曉花光歷亂紅雲繞花落隨風化彩雲春來何遲春去早
君不見碧桃千樹雲低迷滿地綠陰烏亂啼

題駿馬圖

飛黃伏槽櫪下與凡馬羣世無鉗且御神駿丹青僅見曹
將軍筆驅浮雲閃赤電沛艾騰驤絕絢練驪黃萬匹一洗
空眼底神龍手中變墨彩疑含黃澤沙金光吸取精銅鍊
氣吞虹梁籥五雲鬣剪天花散千片吾聞神工妙技能通
靈願天速降房駟星鞭策駑駘換凡骨肖此儼儻權奇形
涼秋八九月白草迷郊坳鐵衣雪皚皚玉帳雲冥冥朝馳

秦關暮巴蜀驍騰捷躡如雷霆渴飲戰血沫流赭生斫戎

首獻

帝廷封狐竄死狡兔滅虎旅歸鞍謁金闕麟閣

高懸駿馬圖颯爽雄姿耀日月

秋夜曲

秋山雨霽秋風香秋天月皎秋夜長凭欄望月夜將半灑
灑露濕芙蓉裳芙蓉爲裳蘭茝佩流珠百琲瑤瑤碎窈窕
璇閨雲母屏懷人今夕空愁對愁對雲屏可奈何獨將幽
恨問姮娥班姬綵帳悲團扇趙女金箏鎖翠蛾嫋嫋秋風
臨別渚盈盈秋水漾輕波輕波如練月千里月淨沙明鷗
不起蘭櫂舟迴蓮子香漁歌隱約輕雲裏輕雲蕩漾水東
西烏鵲橋邊路不迷七寶香車停翠幄九華鐙影覆金隄

是時羣真降僊躅璇宮樂奏清商曲玉洞花濃舞裊低銅
荷燭燼雙鬟綠雙鬟舞裊影蹁躑十二層樓甲帳懸天上
絳河原有路人間青鳥悵無緣誰家怨女粧樓望秋來見
月增惆悵甲煎香凝玳瑁簪辛夷露灑流蘇帳流蘇帳冷
月華秋纖手玲瓏捲幔鈎薄病多愁彈別鶴含情不語望
牽牛可憐玉顏紅易減可憐秋色遞如流祇看落月銀河
畔今宵又減清輝半愁絕征人塞上行鄉心夢斷垂楊岸
垂楊垂柳綰離情秋盡空山夜氣清此時彈箏牽別恨此
時吹笛送離聲王孫芳草遊將倦少婦金閨夢不成金閨
冷澹鴛鴦枕羅幃緘怨相思甚倚檻頻聞永夜更當窻自
織迴文錦迴文欲寄路迢迢一曲箜篌訴寂寥青鸞鏡裏

窺蟬鬢紅泪壺中濕絳綃玉壺鸞鏡長相憶修眉深鎖愁
何極蕭颯霜飈吹井梧關情無限傷秋色秋深夜靜掩湘
幃月照離人影轉遲山遙水遠鴻雁少太息思君君未知

戊午

述懷

束髮愛讀書意氣頗自負文章奇字崇落筆龍蛇走鑿險
闢真境懸河誇辨口進銳戒退速博綜尙約守稽田輟耒
耨苗稼雜稂莠梓材廢樸斲丹青變昏黝白日駒過隙吾
其知之否

少小丁運厄八歲失母氏上承世父祧下鮮兄與弟嗣母
如吾母無母而有恃機杼鳴寒風五夜墮十指慈烏啞啞

啼銜哀痛沒齒生前不能養身後長已矣何以報劬勞
顏爲人子

古交重直諒多聞集羣益獨學孤且陋疑義孰辨析吾儕
二三子風誼貫金石易地作師保彼此互刻責友或抱玷
瑕吾亦攻其隙朋好藥石我握中寶元璧春暄景氣和秋
晚霜華白願爲芝與蘭願爲松與柏

塗松道中作

塗松枕七浦地瀕東海陬炊煙鼓竹林人影蘆花洲遙青
澹若洗近綠濃盡浮古隴鬱衆翠匝天盤松楸霜禽巢其
顛重重結岑樓虬藤斷欲墮龍幹拳抱鉤匪山亦崔巍無
風自颼颼落葉挾惡雨爭送寒潮流前沙連後灘隔岬不

見舟孤帆出林際微聞櫓聲柔俛仰豁遠目萬象澄高秋
睪然遡往蹟父老詳其由北宋元豐間列肆民居稠估船
揚竿旗雜選百貨投元季爭割據此地藏戈矛築城防寇
兵泱莽風雲愁滄桑屢變遷海表開雄州袤延地沃饒禾
稼盈良疇比年泥沙淤霍潦妨耒耜支河塞荒茅狹若漕
與溝虹梁卧其上虛置同贅疣哀哉中澤鴻羣飛鳴啾啾
東南賦斂重疾苦難遽瘳昨讀寬大詔輸租待來甦
願甦窮困毗急獻疏瀹謀高下利蓄洩未雨先綢繆豐年
有高廩儉歲無歉收魚羔酌斗酒比戶騰懽謳我身憐飄
蓬世事真浮鷗移家此中住亦足消煩憂

已未

春雷篇

青旗蔭華甸蒼駕騰祥麟九霄霈天酒萬象開陽春中田
藝黍稷芄芄競懷新抽芽疊青玉吐穗環綠雲初歲緯厥
耒合耦農力勤能使田峻喜無勞遂人巡莠草潛萌句僞
者能亂真一陰卦占姤初生象爲屯春陽布膏澤同受栽
培恩茁蘗漸柔茂滋蔓旋輪困橫攢且旁突亂絲萬緒勞
欲藉膏沃壤據作要路津郊原一以眺野色迷黃昏老農
輟耒嘆棘手不可耘天威勃然怒雷車走鱗鱗烈風摧其
條電火燒其根青蕪飛赤焰一炬騰煙煜嘉種實穎粟漑
以雨露頻農夫攜婦子額手交懽忻嘗稽草人職周禮灋
具陳駢剛利用牛鹹渴利用貍餘根作糞種勿使成荆榛

稂莠雖誅鋤亦感皇天仁五穀種之美無雜蕘稗羣早晚
盼成熟稔黍高下均楚茨籥奏雅土鼓詩歛幽泉貨國用
饒保聚民風淳苾芬潔享祀簠簋歆神人

有感

戎馬何時息西川寇未平安全無善策戰伐有威名野戍
紛屯牧嚴關盡列營從軍遊俠子幾載失春耕
龍虎榮分節貔貅銳出師 聖心誰仰體民隱切周咨
風惡荒村析雲昏大將旗二年勞破斧應悔獻俘遲

病愈偶成

牕月延虛幌燈花照獨眠瘦吟憐病後苦調得秋先舊雨
睽芳訊新寒擁傲羶鄰雞催夢醒晨起理殘編

送人入蜀中

自昔蠶叢路深山竄虎狼請纓馳戰壘磨盾耀軍行草木
烽煙氣風雲俠少裝紅閨含別淚愁絕鬱金堂

鼙鼓秦關震旌旗劍閣來壯懷思報國幕府正求才白
草村煙斷青燐鬼嘯哀生還吾望汝醉飲夜光杯

茜溪

小寒食後雨如煙畧約欵斜艤釣船野水一村花半落春
風兩岸柳三眠

咏斑竹扇

竹扇齊紈飾團欒製最工淚痕猶未減何忍對秋風
遊法雲庵

古寺臨清澗莓苔上竹床一聲檀板叩花影澹聞香

香塘與友人別途中口占

與君一別香塘路指點帆山落照紅行到帆山復回首香
塘遙在暮雲中

寓感

蘭生空谷中幽香入骨髓移向庭堦栽服媚人如此人愛
幽蘭香我弔香蘭死

美人愛折花繁英滿羅幕獨有芳杜蘅山中春寂寞折花
花易萎養花花自若留取異時折美人情不薄

蘊懷閣詩集卷第一

蘊懷閣詩集卷第二

庚申

青溪行

青溪板橋澹夕陽
桃根桃葉生冷香
九曲愁腸斷難續
溪水依舊年年綠
流出琴聲韻淒咽
江南梅花古離別
花開遲花落早去
颿多歸颿少不辨
長亭與短亭
秋林兩岸丹楓老

邀笛步

曹碑蘚泥罨寒綠
淒斷柯亭一枝竹
椀鐙紅笑桓使君
籊籊籠響流銀漢
雲鴨鷓鴣慘啼凍
蟾立山鬼自向枯
松泣蘚蕪

澹白菖蒲青溪頭寂無人語聲

莫愁湖

石頭城邊暮雲紫飛入湖心散成綺兩槩蘋花裊翠煙櫂
歌發處秋風起零香墜粉舊紅樓湖名莫愁人自愁山愁
青水愁綠六代官家號莫愁美人濃笑芙蓉縟

曉起同蔡茂才

春霖

登報恩寺浮屠

高塔鎮金陵飛甍竦而峭清晨攜伴遊攬身縱遠眺石梯
九層轉下坦上漸拗曲闌抱鐵索一柱掛若倒側足股已
慄咋舌頭亦掉勢比累卵危氣復一鼓譟後顧徑路絕前
瞻鬼神導口吸雲霞蒸足躡鴉鵲噪璫瓊駕瓴甌曜靈五
色照林莽煙霧濃麾之不敢到太空搖光晶四顧指而笑

萬井列畫屏畫工失其妙雉堞百丈聳城濠四面繞長江
限南北地勢扼衝要荒榛何代陵斷瓦何年廟西風栗葉
黃六朝一詩弔

臙脂井

辱井宮妃匿低鬟落翠鈿臙脂紅半減猶被晉王憐

遊金山寺

滄汗江濤流茲山枕其面峻介天地壯神采高下絢礪礪
挺竒秀屢屢鬱葱蒨蒼茫蔚靄中萬象儵况變推蓬露金
碧一望眼光眩泊舟入寺門粗敘所經見繞廊鋪文甃石
齒貫銅線精舍繚以曲簾洞瀑絲濺皚皚犀疊屏熠熠象
羅薦如來闡法音梵唄響僧院蘭陀聳孤圓松嶺累重甍

塔搖九子鈴一一巧貫穿陸離五色芒疑是女媧鍊日輪
浮虹梁雲氣落紺殿花織鮫宮綃藤垂虎魄釧異栴襍亭
臺一覽惜未徧攝衣升其巔快哉大觀擅九點齊州煙遙
青隱而現疊嶂爭拱揖層巒列簪弁分晰賓與主部署貴
與賤蹲或作伏熊騰忽驚鬪贖左如倚鹿麕右若搏猥獫
斑斑文雉翔轡轡巨鼇抃兀兀駭愕貽冥冥震暝眴碧雲
撐空天山容婉兮變玉女鳳幘披僊官鵠袍袵微聞珠翠
香恍飫瑤席醺蠟屐着幾兩到此掃煩倦下瞰九迴淵淡
渌繞吳甸資深逢其源奔注至必洑飛瀑聲响雷暴灑勢
激電珊鉤徑寸珠石簪百尺練十幅衝雨帆五兩候風扇
颺竿揚旂旒水驛捷郵傳蟄蚪吞夕霧騰蛟吐晨暉垂翹

走蝼蝻瓌屑疊羸蜺欲窮萬怪狀恐被江神譴憑高望八
極一覽目眴眴壯遊快平生奇絕足矜街鬱葱山氣佳險
阻地勢便陰崖撼鼓鼙絕壑藏弓箭烏號勁控縱犀兕利
殲剽死綏石頭袁慶兵姑孰卞鬼燐飛寒湫佛鐙照苦戰
長鯨曳尾逃老鼃掉頭顛靈威震殞紘毒熾不敢煽

盛朝廣懷柔寰海慶恬宴蜀塞馘戎醜楚山縛狂獠蘭錡
耀弩戟暢轂整鞅鞬江鄉騰歡謳澤國洽儻忭亘古青山
青萬木鬱霧澱銳嶠卧苻婁堂塗茁牡莛春暄紅繡茵夏
雨綠滇泐冬嶺雲重重石室積銀霰茲遊值涼秋選勝愜
懷羨林表夕照微欲去屢瞻戀携筇甫歸舟篙師急引牽
回頭望山色煙靄萬千片傾我古錦囊拭我蒼玉硯飛來

江上月清輝照詩卷

舟行口占

一峰送客數峰留遠岼浮煙近岼收疎柳自圍溪上屋圓
沙不礙水邊舟人來白下多懷古我看青山獨愛秋翹首
秣陵煙樹裏滿空雪浪拍鳧鷗

呈錢宮詹竹汀先生

著述千秋事名山絕業成文章唐吏部禮樂漢諸生道貌
溢真趣古懽無俗情萬鈞發洪響大小叩皆鳴

滬瀆舟次

遠夢碧天外孤舟滄海東潮迴爭挾雨樹暗欲生風城郭
千家合樓船百粵通此鄉民足食吏治易成功

海上

海上扁舟客澆愁酒獨傾魚龍晴有氣鸞鶴夜無聲岼柳
春將轉山花歲欲更孤鐙青髻影蕭瑟愧勞生

遊陸氏廢園

一帶野煙裏斜欄抱短亭水衣無盡綠石髮自然青詞客
百年後樵童幾度經砌蟲聲斷續淒切不堪聽

渡黃浦

平野青浮岼洪流百丈深風聲響蓬背月影碎波心海國
魚龍夜霜天浩蕩唵帆檣通嶺嶠萬里達航琛

辛酉

海虞客舍東吳儀部竹橋先生

蔚光

懸車中歲謝纓簪歸卧空山事苦吟與古爲徒無僞行憐
才如命有真心盡除薄俗交遊習不墜騷壇正始音一卷
梅花樓上月清光引我照虛襟

先生購得王元章梅花長
卷築樓貯之名梅花一卷

樓邀諸同人
觴詠其上

登虞山辛峯亭望海

我生徒爲海國民未識滄海波濤形側聞海虞之山可以
望大海攝衣直上辛峯亭茲亭勢突兀上與青冥連筍輿
初停一放眼千丈萬丈茫無邊濛濛者霧耶冪冪者煙耶
蒼蒼者其青天耶煙耶非煙霧非霧但見接天一氣青雲
杳渺凌飛仙仙人空中一招手示我玉真峯頂之紅蓮龍
王之宮龍母殿倒挂金翠珠纏聯鮫人夜織綃百匹散作

天半紅霞鮮搏桑一枝花四照靈鑱洞啟鋪華筵海童爲
歌海女舞天酒滿泛真珠船鳳蓋鱗萃珠旗蜿蜒秀眉霜
雪皓齒粲然繞玉綬以高舉擊靈鼓而下旋琪花瑤島望
不見吾乃恍惚遊其間其間爲海雲爲海水爲海門爲海
市浩浩乎望洋而嘆驚而走者杳不知其幾千里攬身踞
危石縱目而久視遠岫廻青浮梁射紫一鶴摩霄天風四
起羗遺世以獨立羨古人之無死菴鼉出沒大海東颺浪
震撼蓬萊宮天吳驚走罔象怒潛鱗攫爪吞長虹廓如靈
變倏幽暮百色妖露飛空濛萍流浮轉被漂溺一朝挂罨
岑嶽峯乃知洪流濇濇弗可以徑渡孰若升高遠望四顧
可以開心胸嗚呼安得騎鯨散髮入滄海開我千秋萬古

之心胸

壬戌

夏雲樓卽事和譚音

寂寂重陰晝掩門
主人有酒且同傾
客愁半爲看雲起
詩思多從話雨生
密樹萬重藏野寺
遠山一角露春城
農家聽罷林鳩喚
村北村南負耒耕

讀書夏雲樓示譚天成

春江浴晚霞
溪樓月先到
棊几擁芸帙
炳奪藜炬照座中
有譚生卓犖
擅英妙
澄心瀾靈源
古懷陋時好
枯坐若槁木
興到卽狂叫
鴻辭騁瑰奇
隻字戒竊剽
矯龍升蟠拏
渴驥怒騰越
五嶽撐嶙峋
八極入籠罩
復求經世具
待奏儒

術效冥冥翔高穹
落落渺同調
名山千載業
浮譽那肯鈞
儒冠不誤身
一任下士笑
壯歲嘆顛顛
幸汝年尙少
勉旃勤詩書
知已藉酬報
文章本小技
汝已窮奧窔
更儲元圃珍
急整青雲料
瑯嬛富寶笈
瑤闈竦而峭
回首海上月
星斗燦圓嶠

贈史茂才慶全

語溪近日推詩人
史君慶全字益村
崢嶸奇骨傲冰雪
屹立健筆撐乾坤
三間破屋凍蟠螭
椎結蓬頭四壁立
窮愁能使詩境高
駸駸氣格凌風騷
五十餘年抱詩癖
繁霜滿頭改髣毛
擲掄不避路鬼笑
飢寒那顧妻孥號
君不見黃金使人聲價重
如此詩才亦何用
殘編秃管困此生
何論

身後千秋名嗚呼浮生碌碌盡似鴻毛輕吾儕終當爭此
身後千秋名

遊馬驚庵

春風過語溪吹綠瀉激激隔激花木深隱隱露崖厂密林
圍數弓層轉進以漸修廊青篠垂破扉白雲掩虛堂懸梵
鐘佛像肅且儼其旁有卧碑剝蝕字難辨偶陪老僧話夕
陽忽西崦頓使歸路迷咫尺若重險風聲撼石馬四野色
黯黯

語溪賽社行

溪西擊鼓聲鑿鑿溪東鳴鉦迎社公喧呼塞道語雜呢有
酒不治兩耳聾彤幢翠纛開前鋒招搖上駕十二龍操后

羿射十日弓毆疫鬼爲沙爲蟲霧之來下雲容容前飛廉
後驅豐隆駟玉蚪朝上清宮天韶大奏聞呼嵩玉屏珠箔
七寶籠錦繡錯落金芙蓉神保聿歸禮告終銅盤高爇香
冥濛紅帷列炬圍重重白鬚老人齟髮童舞蹈來往無停
蹤鬣鯁倒傾臘釀醲饌梁綠黍盞有餘野牛肥臄爆與犂
間以菰糲兼葵菘宵深醉歸艤小舸叮囑強視迷矇隴鄰
家兒女懽笑濃禱神祝歲豐無凶五稼嘉熟神之功明春
吹灰候夾鐘賽神更竭田財供神日嗟汝民愚蠢汝田不
足償租庸急簡稼器勤耕農東方或憂杼柚空似此糜費
神其恫洞酌杯水精誠通或拜或跪或鞠躬神降之福慶
屢豐陰雨膏黍苗芃芃其比如櫛崇如壟

北新橋春望

半林殘花一溪水春盡江南三月裏溪南移船溪北停斜
陽渡頭楊柳青渡頭家家種楊柳何處青帘賣春酒輕風
一路甕頭香犢背兒童笑招手

同史益村

慶全

譚半溪

音

湖涇泛舟分得五古限

七虞韻

春塘雨收霽一望綠滿湖湖涇泛扁舟雙槳開煙蕪夾岸
多榆柳點點浴水鳧路轉葭菼邊水門曲且紆榜人引舟
入樹密雲模糊微聞清風香煙港浮菰蒲須臾見村落環
舍田膏腴提筐有饁頰荷鋤有耕夫落日歸柴扉斗酒齊
懽呼竹籬兩三層編以荻與蘆篁苞翠欲滴豆苗綠不枯

雜花飛滿堦髣髴源圖春游此停憩勝侶同清娛客歸
發浩唱渺焉思黃虞相期築一廛漁釣日夕俱綠簑青箬
笠共作煙霞徒

譚半溪去歲喪子今又兩女並殤作詩慰之

與吾同病竟如此後喪兩女前喪子嗟余長女甫毀齒卧
疾淹旬卒不起一子聰慧罕與比纔及四齡忽殤矣一子
正在襁褓裏溘焉長逝隨兄姊使我涕淚滴不止憂從中
來不自己兩月抱病在牀第陡然猛省勿復爾我所生者
先我死生我者誰我所恃余之勿畏從此始吁嗟乎半溪
與我同病亦至此

讀史記作

羸氏失其政楚漢爭逐鹿漢祖先入關收功乃神速義帝
若人存漢豈甘臣僕項王先殺之漢王發兵哭漢能用陰
謀弄楚於掌握哀哉楚重瞳烏江勢窮蹙不肯王江東英
雄真面目

鴻門饗軍士精銳不可當沛公一來見怒氣旋消亡直言
構讒者司馬曹無傷甲帳開華筵卮酒斟金觴三爵舉未
酬寶劍飛其旁君王自歡讌公等休倉皇不肯殺沛公度
量真帝王可憐如廁者疾走心驚惶

美人不忍離駿馬不忍棄慷慨垓下歌左右同下淚一片
真性情人人服其義所以魯父兄守死不肯貳王本封魯
公葬之於魯地漢王爲發哀同於哭義帝

太公爾何辜身與魚肉似若無項伯言難免刀俎死漢王
視乃公直一義帝耳萬一竟見殺縞素兵又起縞素兵卽
起追悔無及矣豈有老父身而反殉厥子

高祖晚年來兒女情何濃愛子不得立泣下歌飛鴻此曲
淒以悲大有垓下風音節雖稍變哀戚頗相同彌留牀第
間到此智計窮畢竟楚重瞳大王氣自雄

子房善導引飄飄有僊骨晚年棄人事閉門以養疾呂后
強要之商山招隱逸得非學仙成松喬與之匹偶從羣真
遊召之來帝室特假四皓名小試神仙術不然商山叟養
高非一日高祖重其名不能一屈膝何慕於太子一呼而
卽出

咏十國春秋

臨軒漫試入關詩采石浮梁竟濟師曾樹寶幢陪佛座又
傳紗帽逐降旗舍人侃直陳封事國主風流製豔辭惆悵
宮衣天水碧教坊侍女涕漣洏

徒把雄圖付子孫竟無一箭爲酬恩競攜愛妾來戎閩忽
報王師破劍門佳節桃符工覓句劈箋花藥暗消魂問誰
待詔修降表李昊當年故事存

玉皇下降女巫身斗帳香霏內殿春江左文書勞遠寄漢
南符瑞笑紛陳軍營枉自驅神象鐵索憑誰挽巨輪唱罷
羊頭二四曲海船無數載奇珍

玉册祥開六十年寶皇許作大羅仙甘棠零落黃崎港華
萼摧殘白幟船孽鬼漫勞宮裏視歸郎穩向帳中眠蕭牆
禍水滔天湧春燕分飛絕可憐

五代宮詞

玉人生小住渠亭金谷花飛滿翠屏憶得紅紗纔繫臂彩
雲一簇護輜駟

玉册新頒御座前內人扶病整花鈿泰壇不見鑾輿駐閒
過春風廿四年

瓊花影殿日熹微漠漠餘香罨繡帷怪殺雕梁雙燕子昭
容牽起御牀衣

獻壽長隨聖母旁碧琉璃襯酒痕香自從內殿承恩後徹
夜笙歌侍晉王

靜鞭聲裏控花驄市肆巡行西復東採辦薪芻與蔬果半
充天府半中宮

水調歌頭御製成就中風韻最輕清玉簫永夜無停奏侍
婢偷呼亞子名

紅裙六幅曳輕羅新學琵琶唱艷歌樂部教師誰第一內
人傳喚敬新磨

花氣侵簾夜漏殘宮娥沉醉坐團欒紅薇香露濃於酒清
供先朝翡翠盤

降龍仙仗跨金鼇薦福羣瞻佛殿高此是當年誰第宅許
州節度使溫韜

一笑傾城花見羞腰肢瘦損倚紅樓篋中檢出金千錠記

得將軍舊姓劉

宮車晚出正倉皇忽報馮妃試豔粧却笑嬌癡新女壻雙
雙拜跪太妃旁

海棠花睡露華濃猶似當年鏡裏容斗帳香銷環珮冷侍
臣新署右飛龍

元宮詞

玉泉金水繞宮城闕下千官整轡行朝罷君王迴步輦鳴
鑾遙和珮環聲

畏吾兒殿枕延華璧月溶溶上絳紗團扇秋來怨搖落如
何又進玉虬花

直廬新接笑言溫軟繡春融麗正門一串珊瑚珠百琲白

絨繡出詔西番

薄醉花間解繡襦下階傳喚侍兒扶月光夜夜明如晝新
賜西洋塔納珠

馬上鞦韆逐彩輿冰花亂撒翠雲裾白翎一曲歡娛短妬
殺當年碩德閭

線珠亭子擬華清浴罷更衣解宿醒躬拜御牀呼萬歲君
王親賜兔胎羹

玉螭噴水瀉潺湲瓊島依稀海上山行過紫城回首望紅
雲一朵繞龍顏

七寶然鐙夜未殘一聲打弼過雲端殿前歡曲憑誰奏莫
把琵琶子細彈

淡淡蛾眉楚楚腰四箱列坐最魂消內臣密啟云都赤免
使官家晏退朝

翠華昨夜駐泥河執役鷹房侍從多捧出御前金一錠海
青報道獲頭鶩

朔風捲地凍雲飛草淺龍沙看打圍獵取黃羊充御膳內
官立雪盡朱衣

邸第樓臺曙色開赤城霞起護天台銀塘水綠蛙聲寂懷
孟欣逢翟芾來

詐馬筵開酒滿樽鼠姑香浸月黃昏就中新沐椒房寵身
着紅衣號只孫

臙粉宮亭景最幽春心應在殿西頭御溝亦有桃花水不

解新詩底處流

碧紗温室夜檮蒲紫菊花開貯玉壺忽報拔都陳奏牘大
官新染白髭鬚

金城蔥鬱氣佳哉駕幸灤都清暑臺二十六宮齊納鉢貴
妃一路看山來

雕羽屏風暖氣回一聲羯鼓萬花開先朝莎草今何在芍
葯薔薇滿地栽

汲得寒漿滿玉卮貯看花雨散瑤墀西宮月色涼於水女
伴相邀拜帝師

癸亥

題李山人

世則

溪山積雪圖

琪花狼藉滿山陬古徑雲深凍不流爲問畫家原姓李不
妨喚作小營邱

題陸子若同年

學欽

所畫山水

天生風骨絕時趨書味沉酣入畫圖除却撐腸千萬卷更
無粉本費臨摹

甲子

苦雨

四野元雲合千溪濁浪翻鶯花迷醉夢煙樹失晨昏竹塢
籠愁霧藜牀濕漏痕龍蛇驚起陸危坐閉柴門

赤幘巡街市江都術竟虛銜沙棲海鳥病濕困河魚詩興
催租敗朋交會面疎萑苻滋草竊何以靖鄉閭

雨夜偕李山人世則宿長真閣贈孫子瀟孝廉源

湘卽次李山人韻

別君纔浹日忽忽起離思
冒雨同相訪高齋好賦詩
更殘黃葉寺秋老碧梧枝
曉起開新霽登山猶未遲

雨後同孫孝廉李山人破龍澗觀泉卽事成詩用
常少府韻

龍爪破空去腥風尙滿林
泉飛千嶂迴雲卧一龕深
但覺山水樂頓忘塵世心
僧房琴挂壁激宕發清音

子瀟齋中同李山人及其子馨合作冒雨訪友圖
明日遊破山寺歸復合寫小幀卽題其後

清秋多曠懷素心慰寥慄
晨遊破山寺攬勝遇佳日
山容似美人新浴試梳櫛
畫家得妙境却恐覲面失
磨墨急濡染勢若飛鳥疾
相爭不相讓精神聚成一
重披昨日圖煙樹補數筆
亂頭麤服中真趣自橫溢
難窮山勢峭頗得秋興逸
圖中聽雨人呼之不肯出

盛子履孝廉偕李味霞山人及味霞之子小霞下榻
心青館合作冒雨訪友圖

昭文孫源湘

諸君皆山人來訪山中友
山中多白雲無心自相偶
飽喫黃米飯痛飲老白酒
果腹各訢然濃磨墨一斗
初作澹峯巒繼具遠林藪
小溪殊自佳老樹亦不醜
忽然風雨來煙雲筆端走
煙雲變滅中化出千萬阜

不知何山頭出自阿誰手我屋在崖邊君舟在溪口
圖中兩三人亦不辨誰某或云高房山或云黃子久
一笑姑置之且酌酒盈缶

蘊懷閣詩集卷第二

蘊懷閣詩集卷第三

乙丑

雨中偕屈通守

保鈞

鮑茂才

倬

遊維摩寺夜宿觀

海樓

二子翩翩士時存山水心有誰同曠逸惟我共登臨一雨
歷三日千巖盡綠陰行行到山寺濕翠襲衣襟

山僧前揖客笑我是癡人不速來三友煙雲滿一身攜將
書畫好辨識宋元真飽看溪山色臨摹更有神

竟日遊蹤倦居停觀海樓餞春當此夕夢雨忽生秋宿霧
簷頭入飛泉枕畔流何時開霽景紅日一輪浮

觀海樓曉望

天雞一聲鳴披衣候晴旭不見朝暎紅陰雲斷還續彌天
溟漲浮不辨樹與木排闥海氣入迷濛盪空屋化爲微雨
絲絲絲聚成縠麾之不肯散終朝繞巖峪傳聞日出時三
起復三伏紅雲導飛輪爛如五色玉如何登斯樓不能一
寓日竚望曙色開山僧飯已熟萬事類如此平生願難足

海虞竹枝詞

湖田煙水綠浮螺中有紅粧夾岍過傳說水仙停賽會只
因雨水去年多甲子季春里中水仙神會極盛俗傳水仙
出門多雨水是歲果大水明年遂停賽會
燒香浜口夕陽斜隔水花飛紅似霞一路青山一溪水綠
陰深處是儂家

深樹黃鸝百轉殘小樓睡起怯餘寒踏青穀雨三朝後程

稼橋西看牡丹

程稼橋西有農家所種牡丹百餘本花時遊人頗盛

麥苗青接菜花黃拂水巖邊別有莊十畝嫩芹香
春醅熟勸郎嘗

冶遊忽遇雨廉纖薄晚開晴興又添看到枝枝水楊柳春
痕飛上兩眉尖

春來社鼓日喧闐翠羽紅旗鬪絲鮮儂愛梳粧樓近水慣
看北府倒划船

菡萏花開漾碧波石梅澗口雨新過郎如澗水自流去儂
比蓮心苦更多

八月園中早桂開吳縣裙袂試新裁翠娥珠串香如許可

是修簫月底來

山腰一角露茆齋
蕉雨蕭疎滴滿階
共道西城山色好
那知秋意北山佳

一櫂菱歌隔翠微
秋江明月望郎歸
菊花黃處酒新釀
楓葉紅時蟹漸肥

劍門

雷斧劈山飛電燦
黑螭跳踔鱗甲焦
翻身擊石石罅裂
截開兩柱撐岩堯
巖扉窄險徑路絕
疑有虎氣生威驕
雲開霧合恣變幻
氣候不辨暮與朝
精芒躍嶺一千丈
天上星辰爲動搖
嘗聞劍閣天下壯
雄關勢接岷峨遙
山抱西南石向北
似此亦足分其鏖
棧梯直上踞絕頂
俯聽馬足風

蕭蕭腰間寶劍向空擲
雄心不逐浮雲消
干將是我真面目
奇氣直欲排雲霄
黃昏風雨四山黑
鮫人啼血驚寒潮

山行口占

水檻風亭澹夕陽
松花十里細聞香
我來留守祠前望
不見東臯舊草堂
菜甲臺心雨後滋
綠楊城郭暮春時
阿誰摹寫癡翁筆
惟有畊煙老畫師

咏枯樹

枝枝高向碧空擎
形影相看太瘦生
一夜飛霜寒有色
干山落葉悄無聲
爲憐苞孽思垂蔭
若吐芳菲待向榮
莫怪臨風怨搖落
前身我是庾蘭成

不受冰霜葆歲寒那知花葉護持難昏鴉半嶺倦將下東
雀一枝栖未安前此競誇春爛漫到今始覺與闌珊平林
露出山真面勝把營邱畫本看

璜溪夜泊

短檣沿溪泊天寒夢不成破冰衝水斷缺月借霜明詩到
殘年少愁從卒歲生蓬窻聊索句砧響助淒清

東胡蛟門明經

金誥

別君不過百餘日君已吟詩百首餘未肯閒身消白晝獨
傳高唱掩黃初梁間皓月懷知己木末秋風悵索居今日
相逢復相別別來還盼故人書

送張椒卿明經

鐸歸里

料理殘年事知君此去忙無衣還待贖有債且先償風雪
催歸權琴書整客裝生涯勞負米幸得慰高堂

丙寅

題黃茂才

臣變

蜀遊詩藁

心血嘔不盡江山更助君長吟楚江水平揖巫山雲吳會
懸車日才名遠近聞乞君紫霞縷織就留僊裙

郊行

郊行寂無侶忽聽人聲喧隔水若無路過橋別有村草花
微見影梅雨未成痕野叟愛閒靜攤書自課孫

五月二日同顧茂才

思義

泛舟虎阜山塘

珠翠周圍潑眼紛銀箏檀板醉紅裊花間人影宜臨水霧

裏衣香欲化雲小艇獨攜書畫卷鄰船盡帶麝蘭薰宵來
燈火紅於晝賽却揚州月二分

五人墓

不許朝廷旨竟由東廠傳氣雖猶市井義共薄雲天一死
重山岳千秋有墓田血痕應化碧宿草自芊芊

燈船競渡曲

夕陽已下空山裏山塘又見紅雲起銀屏六六盡張燈畫
舫雙雙齊渡水听上行人看水嬉水邊絳樹照干枝螭頭
火齊輝蘭橈龍口星球結綵旗綵旗蘭橈紛馳逐大家爭
蕤銅荷燭琥珀浮來鏡面紅珊瑚擊碎波心綠綠波紅鏡
兩平分象板鸞笙徹夜聞西舫藏闔筵正設東船挾瑟酒

初醺此時綵鷁爭喧鬧火珠忽訝驪龍照泗水篙師興益
狂錦標高插如庭燎鴨頭暖漲乍添温躍出金魚五色鱗
鳧雁羣飛牽翠荇鴛鴦潛伏傍香蓴蓴絲荇帶輕於線掩
映波紋淨如練二八窈娘唱竹枝春鶯嚶嚶歌喉轉清歌
宛轉妙當筵舞扇迷離撲翠鈿不使周郎頻顧曲似隨賀
老學調絃調絃顧曲娛良夜繞船燈火薰冰麝儂顏嬌似
海棠花燈船紅似薔薇架夜半燈殘玉漏稀畫船簫鼓送
人歸樽前買笑金輕擲醉後留髡燭漸微銅鈺滴盡紗牕
曉翻恨金雞啼太早後夜還期盪畫橈黛蛾重向燈前掃
風月歡場去若馳陰晴明日竟誰知扁舟我亦東歸去燈
下吟成競渡詞

山塘絕句

千人石畔二仙亭聞說雲旗是處停如此彌天花霧裏漫
勞白鶴馭仙靈

朱簾倒影碧雲流短簿祠前記舊遊添出紅樓三四所阿
儂前歲住揚州

夜合花前酒滿樽玉簪輕卸醉留髡紅香指甲尖於筍細
點吳宮獺髓痕

泣露芙蓉剩淚香古墳指點是真孃牽情只有紅心草和
雨和煙總斷腸

姑蘇懷古篇

將軍教戰吳宮裏瞋目一呼寵姬死君王竟無兒女情紅

顏喋血不敢驚旌旗百萬西破楚一戰功成在此舉闔閭
死吳霸衰吳霸衰西施來一朝宮闕變墟莽麋鹿走上姑
蘇臺美人輕江山重笑口開頭顱送美人重江山輕歌管
罷烽煙生英雄意氣兒女情一齊變作江濤聲君不見胥
江濤水瀉明月寒綠一天沁心骨

哭陸子若

氣誼相憐恤文章共切磋論交君最摯獲益我尤多舊雨
悲隣笛修門泣女蘿定文丁敬禮珍重爲編摩

哭胡蛟門

吾生寡兄弟篤志求友生寥寥數知己共訂寒鷗盟賦命
同屯遭願言守堅貞天心不可測變故倉猝攫子若邁羸

疾竟返芙蓉城蛟門溘焉逝先後遊上清吾生亦何爲恨
不從君行

吾爲乞食計久客虞山里前接蛟門書驚聞子若死余亦
有報函書辭頗綮綮哀哉吾兩人頓失一知己豈料一月
間悲風又狂起君竟舍我去哀痛不自己以友而兼師如
君能有幾

贈吳頊儒茂才 卓信

久聞吳君名愛讀吳君文兩年客虞山始得交吳君貌古
心亦古峻骨撐嶙峋疑其性偏僻狷介不可親徐而聆談
吐意味殊津津繼而察動履跬步皆恂恂久而與之化氣
若芝蘭薰澹如秋水澹醇如春醴醇乃知吳君文亦復如

其人真氣涵萬有說理精而純僕性極鈍拙幸君不我嗔
謂我頗坦直樸遯全其真共玩尚湖月共揖虞山雲君如
山頭雲靄靄盤氤氳亦如湖上月皎皎空塵氛願理五色
絲繡此平原身

輯蛟門遺詩感成一絕

飄蕭病鶴立蒼苔會否詩魂喚復來冰雪窖中人對語更
從何處着塵埃

茗椀香泉當酒卮安排寒具祭君詩寺鐘殘月人何在清
夢孤臆乍醒時

書吳節母顧太孺人家傳後寄頊儒

陰雲蔽晴曦颺颺走叢薄靈寒鬼雨泣狂飈撼羅幕鎗光

小於豆青燐起牆脚一量屨夜緣十指凍將落堂上白髮
姑藉此進羹臙膝下黃口兒藉此謀衣襍憊苦十數年積
勞病乃作長隨泉下人不負生前托後來兒讀書聲名滿
京雒息影歸江鄉白楊繞春郭杯酒奠黃土酸風起巖壑
猶憶母在時笑言宛如昨巾箱手澤留教兒勤討索兒今
不見母泫泫淚交錯長念生我哀豈識有生樂

丁卯

古墓

漆鐙蚘油炙石髓猿狖鼯鼯幾回死玉魚暫埋久躍去黃
土餘輝寶花起初疑埋骨在邱壟或恐平地亦荒冢紙錢
高燒絮酒弔地下聞啼又聞笑仙才鬼才爾莫爭彭祖哭

殤殤笑彭

古井

冰輪一片天上圓蟾蝓薄蝕缺不全在羊吸取玉甃泉清
光一綫飛上天石蛟千年凍不死飽嚙寒漿沁心齒莫持
碧火照老魂恐有人從水中起

古宮

泣秋月愁春風竹叢啼綠花惱紅朱闌六曲飽香蝨蠨蛸
補出珠簾櫺蘭葉裊雲御溝紫豔鬼折腰掠香水連臂踏
歌赤鳳皇老狐跳出偷珠璫

古壘

驚沙沉沉蔽虛廓苦霧黶雲氣慘惡觸體入地三尺深白

蠓黑蟻爭餘腥當年轅門盛兵仗蒲萄酒醉攪毬帳猿臂
材官搗戰鼓帳中美人胡旋舞孰是龍彪孰貔虎無數英
雄入泥土荒原宿草青芊芊玉關明月仍照天

花朝怨

釵梁麗毳團金懸翠裙鳳子雲樣鮮隔花如煙鳥聲細樓
上春寒人倦眠行波淺小水紋纈睡思唵懷兩淒絕一簾
香夢過花朝百草紅心葬花骨鎖門了鳥春晝長落花無
言人斷腸君不見皓齒明眸罷歌舞墓門秋寒泣香雨

同張椒卿明經王葆初同年

履基

餞春語濂溪舟

中口占

吳艚掠水水初平卧柳千條夾岸迎行過紅橋東渡口落

花深處有人聲

玉環曲

語溪張片山家藏玉環一雙相傳爲河東君故物盛子見
而感焉作玉環曲

絳樓僊去苔空綠垂楊垂柳傷春日杳渺梨雲化碧煙雙
環剩有茗華玉語溪賞鑒集名流殘璧遺珠競討搜張氏
收藏推第一河東故物到今留停勻肉好看無恙晶瑩不
受纖埃障碧影雙懸秋月明紅紋一點春雲釀精巧真同
玳瑁簪玲瓏合貯流蘇帳埋玉深深金粉消磨掌引我添
惆悵當年瑤島來僊客題詩好做簪花格徐佛才名遠近
聞絳紗弟子稱雙璧垂虹亭畔水初平玉笛梅花愴別情

南浦未消春水恨東風吹動珮環聲珮環聲動僊霞帔尙
書一見頻傾意翡翠簾前柳眼顰芙蓉舫裏花顏醉醉中
巧笑鏡中顏舞扇低迷壓髻鬢逸格蹁躑渾似玉柔情宛
轉妙如環玉連環似昭華瑄中邊一綫清輝滿粉盞香篝
處處隨晶奩銀蒜朝朝伴清波激灩濯明璫小築琴河拂
水莊媛介才人停繡輦元文嬌女贈新章纏聯贈答裁詩
稟詩情也似瑤環好金鴨添香暗繞縈玉蟾流影斜迴抱
自從慵髻感秋風紅粉叢殘首似蓬玉暈啼痕籠淺碧環
凝淚點怨新紅尙書身後家蕭索秋槐霧影迷粧閣已恨
金甌好夢虛那堪貲產傷零落罡風碎玉痛倉皇環珮魂
歸碧玉房一死頓消風浪險千秋遂使姓名香舊時陳迹

皆灰燼玉籤緗帙無人問吉光片羽剩雙環珍藏不數劉
娘印玉環聲價重連城秋水冰壺一樣清繡匣開時看皎
潔紅絲裹就更輕盈可憐東澗風流歇讓與蛾眉著名節
玉女同畊種玉田山人罷采西山蕨僊姝雙珮落人間舊
淚猩紅散作煙亥字穿珠工點綴丁香染黛自勻圓卽今
見物多振觸百年脂粉空金屋我向花前翫玉環彈成綠
綺傷心曲曲罷燈殘酒半醺語濂溪水澹黃昏屏間忽聽
珊珊響竹影依稀月下魂

語溪返櫂

湖光沉夕照帆影鎖溪煙隔水少漁火月華載滿船五更
擁被冷一夜抱雲眠曉起蓬牕坐青山到眼前

喜雨用曝書亭集紫藤花下聯句韻同王葆初作
時與葆初同寓照曠閣閣中藤花盛開賦此以柬

主人

一春天久晴不雨歷三朔古礎倏潤液陰雲罩椽桷生花
筆不枯况被香雨濯喜雨示我詩見獵共君較藤枝滌垢
氛斬新氣清卓話雨坐吟花游心入元邈喜見青蘚濃紅
蕉心可剝喜聞黃鶯啼綠楊腰可搦晚霽蟠虹蜺澹青碎
暇殼而尤喜藤花紫茵綴珠幄雨意殊浸淫詩情競瑯琢
安得濯枝雨成霖化礎确春農耒耨勤婦睡驚覺秧田
叱犢犁鎌豆恣鳥啄試讀汜勝書稼圃亦可學河陽舊從
事好奇推李涿高吟花下詩濕雲剩簷角斑鳩盡情啼粉

蝶信手捉君勿嗤我詩啁啾類鳩鶯喜極拍案起冒雨往
來數

同孫庶常

源湘

吳茂才

卓信

王孝廉

履基

譚茂才

天成

黃茂才

廷鑑

張明經

鐸

遊石屋洞次黃

廷鑑

韻

鵝鴿棲高雲西山氣清邃其下有石屋陂陀積巖翠其中
雲氣蒸蓬蓬鬱其蔚其旁劖孱顏撐拄危崖墜環舍泉琤
琮澄潭沁心胃勝情印須友薄遊訪靈闕樛枝挂煙蘿香
索漑雲緹一步一世界心清滌煩悻五月披裘尋裁雲作
衾被可以秉炬遊靈符掃山魅可以枕石眠仰吸天酒醉
可以煉神丹石鼎炊金沸牽蘿笑補屋功成非一簣卽此

審容勝絕與人境異移來庇寒儒斗室抱雲睡十笏山人
居侯門失其貴清嘯遏金石高歌動天地胡爲神僊窟悶
茲靈秀氣廣厦志不申勝遊倦還未同人笑我癡盤薄狂
興至懷古立蒼茫作詩闡奇秘遐溯高隱蹟載考吳地記
石梅澗觀荷次黃琴六 廷鑑韻
輕綃一匹漾漣漪小榭瓊瓏倒影窺山脚別開生面好水
鷗無數向人嬉

手繡花史選羣芳細與評論費主張不爲凌波賦神女一
枝湘管更誰忙

觀荷絕句

停橈有客看花忙那識無花處獨香路轉西溪最紆曲更

無人共立斜陽

冬日曉霽

曉霽陰霧收負暄茆檐下古梅立癯瘦蕭疎不碍瓦凍癡
玉碎擊香溜珠倒瀉對門撐孤巉林梢露丹赭遐睎矇矓
開寒枿滿平野村醪味頗醇客至我心寫

山居卽事

蒼雲環寒峯礮礮鏗音秀曠密摧琅玕高稜踞日獸豁呀
瀉澄湫蛟鬣補其竇聒耳掃林籜逼我詩骨瘦山鬼啖玉
榮呼之不肯售鬱儀鞭躩烏泠泠吸餘嗽

蘊懷閣詩集卷第三

蘊懷閣詩集卷第四

戊辰

將至京師留別諸同人

鎮洋 盛大士 子履

悔作籬籬鶡啁啾戀故林但消干日酒已愧半生心
春陰淺滄江樹色深親朋嗟遠別莫使雁書沉
驛樹春歸早行人落日邊亂鴉雲萬疊匹馬路三千塵海
茫無岬溪山舊有綠柳條休盡折留盼渡頭船

京口晚渡

日落飛鳥背暮山雲不停金焦兩點碧楚粵一帆青江水
自今古天光入杳冥泊舟瓜步口燈火亂春星

瓜洲

石岬環沙渚江潮欲上時雪花斜抱樹煙柳暗生枝水閣
澄開鏡春山澹入詩時平無戰壘風靜戍樓旗

梅花岡

莫話留都事寒鴉落照昏江濤流戰血坏土泣忠魂碧草
滄桑改丹心汗簡存出師揮涕淚成敗不容論

隋堤

十里隋堤水淪漣漾錦鱗樓臺二分月楊柳六朝春澤國
舟如織鹽田戶不貧持盈訓勤儉戒爾蕩遊人

月夜偕沈方立同年端遊平山堂

水月爭輝處扁舟載酒行橋眠溪岬曲山揖寺樓平覓路

陪僧話催詩轉漏更魚磯燈數點不斷權謳聲

高郵道中

荻葦飄蕭際漁歌遠近聽露痕浮渚白水氣入雲青孤燕
營新壘饑鳧失舊汀荒陂泥淖沒吹雨夜聞腥

舟中雪夜東沈端

客夢若相續清懽與子偕飛鴻滿天地急雪渡江淮撥火
消茶話衝寒壯酒懷盤殮剩鱸膾鄉味少尤佳

清江浦

津亭風色曉千里舳艫通放閘濤奔馬衝沙石跨虹酒旗
飛鳥外燈火亂流中別有溪邊屋春鷗狎釣翁

旅泊書懷

旅懷成獨夜遠道戀微名酒力撐風健詩唇嚼雪清山藏
雲淺澹水吐月空明一櫂來江北征途又幾程

黃河

昏曉陰晴變驚濤撼碧虛淮流防混合清口慎宜瀦鳧雁
千村失魚龍一氣噓已聞洪澤水漂蕩及巢居

邳州曉雪

侵曉天微雪征車過下邳絮迷官路柳花簇酒家旗斷坂
人煙少長途僕馬飢前行三四里紅日照流澌

界河驛

一水界鄒滕平臯曉翠凝馬蹄消霽雪人影踏殘冰路遠
車行早春寒酒價增高原一迴眺鳧嶧秀峻嶒

鄒縣謁孟子廟

傳食齊梁國匡時禹稷心知言非好辨造道必資深魯廟
門牆近嶧山喬木森聞知五百載絕學冠儒林

山行

不陟山谿險安知行路難鵬弦翻月暗馬骨削雲寒拂面
塵千尺攬身嶺百盤豁厓多怪石不敢下車看

客倦日將夕馬飢途又長沙痕搖澹白石氣閃昏黃壞壁
風霜古頽巖草木荒崎嶇行不得心定卽康莊

客中春欲半寒氣太蕭條橫岍冰猶壯穿花雪轉嬌戍樓
時聽鼓野逕不逢樵林杪炊煙合人聲近漸囂

十里五里間出山還入山颺輪紅日轉霜翻白雲攀村市

人通巷茆庵僧閉關晚餐眠尙早倚枕把詩刪

蘆溝橋

遠翠西山落鞭絲拂軟塵日邊虹吐彩河畔鯉浮鱗紫氣
千門曉綠陰萬井春石闌獅數百閱盡往來人

觀象臺銅儀歌

金城萬雉排青蒼司天觀象臺高驤玉瑱雕柱壁飾璫羅
列儀象輝煌煌攝提運衡戛八琅星環迸露作作芒皎若
日馭升扶桑東西二道亘赤黃翠雲崇靄蟠中央地平紀
限天尺量錙黍寸積絜短長天風吹動竿旗揚五雲來儀
丹鳳皇紫薇中殿開華閭金鱗盤結輝

天章東旁精舍銅壺房石臺銅葉渥彩彰仙人露掌承華
漿開榮灑澤洪無疆昔聞渾儀元史詳郭守敬造銅毬良
舊儀歲久當更張有司奉勅臺下藏螭蟠石蘚頭戴霜
土花斑剝生冷香新儀精密勝故常登臺占象睇八荒糺
雲掩靄和風翔苗螟葉蠊銷氛殃浪井銀甕浮春陽地泉
天酒舖萬方臣民拜手頌我

皇璣衡授時法古唐時寒時燠時雨暘五稼嘉熟祝歲穰
春臺熙熙人樂康

槐市斜街晚眺用竹垞移寓韻

城隅地僻少車輪薄晚樵童負粟薪莫悵紅芳易消歇六
街猶有賣花人

盡日閒行曳布鞵爲尋竹垞舊書齋詩人老去槐陰綠深

樹煙迷屋後街

花外青帘夕照殘買來酒味稱心難誰家標寫江南釀菜
市停車仔細看

蘚徑掀泥駐客驂槐籬小飲佐清譚一時裙屐開詩社古

井寒泉沁齒甘

竹垞詩昊天寺近井泉
甘今寺已廢井泉尚存

送王葆初之官秦中

薄宦亦非計其如祿養何輕裝行路便名士入關多石穴
搜奇字峭函發浩歌春明門外酒臨別醉顏酡

一片燕臺月隨君共遠行壯遊多勝蹟傲吏有循聲秋草
官衙綠春農沃野畊雍岐民俗厚治行易觀成

題畫

村北村南霜葉紅蓼花兩岬晚霞烘披圖却笑長安客不
及滄江一釣翁

吳巢松孝廉

慈鶴

畢子筠孝廉

華珍

同寓松筠庵

賦贈

癩病鉛槧廢秃管愧枯槁適來招提境尋詩訪朋好嶽嶽
吳季子才名冠江表健者銅陽卓二妙互傾倒僦居入禪
林斗室絕塵擾庵以松筠名文星位置巧晨露溢園花夕
陽噪林鳥馴鴿呼雉媒蝨魚避龍腦籤軸紛丹黃緗帙積
青縹揖客篋車停呼僮落筵掃促膝坐十笏清譚暢懷抱
座間風雲生壺中天地小我昔海上來日出樽桑曉紅霞
千丈浮蒼煙四山繞靈威山隱居霓裳隔縹緲茲從二子

遊恍登十洲島禹窆搽奇文龍宮闕靈寶高論眇今古疑
義恣蒐討京邑車轍喧輜輳塞街道焦煙蒸蓬蓬烈日逼
杲杲觸熱襪襪子清涼氣絕少高朋冰雪譚往復破煩惱
消夏憩僧寮削柿脫手藁詩句留長安他年認鴻爪

閒情十二首

瑤臺病鶴倚黃昏翠羽飄蕭舊蘚痕遠道漫思通一水曉
寒只合閉重門風鬟綠剪簷前絮花骨紅消鏡裏魂雙漿
橫塘重問渡浪吟桃葉與桃根
畫梁海燕可憐生雲母屏風玉柱筍未免情人怨遙夜浪
傳名士悅傾城羊燈影細珠簾薄鴛帳香寒綺夢清不分
蓬山天咫尺隔紗聞得步搖聲

犢車花外響春雷疑是章臺走馬回南浦水連河畔草北
山雲罩隴頭梅羅浮舊夢俄成幻雪夜新詩浪費才多事
紅襟雙燕子水晶簾下故飛來

那有明珠贈蹇修更無消息到銀鈎花晨煙靄濃於酒春
夜星河澹若秋人共黃楊逢閏月詩隨紅葉落清流霓裳
曲是鈞天樂不散人間萬斛愁

縹緲神山海上仙彩雲如霧雨如煙阿嬌合貯黃金屋有
客曾耕碧玉田孔雀東南餘別恨浮雲西北是情天文姬
琴調哀難續不待重彈第二絃

洞庭波浪渺愁予何處靈妃響珮琚澧浦夕陽人去後亭
皋落木雁來初慣栽南海相思樹漫羨東方比目魚垂手

蘭干明似玉卷簾天影浸秋虛

碧蘚空階暮雨添輕陰漠漠草纖纖鴛鴦錦段書傳恨鸚鵡芳情語避嫌金谷鶯花原旖旎玉臺硯几自清嚴懺除綺業難消盡麗句重吟昔昔鹽

日出城南陌上桑翠鈿羅綺耀明光娉婷似惜芳春晚邂逅相逢大道旁紅雨連朝迷巷徑綠陰明日滿池塘不知千騎東方至五馬誰家飾乘黃

蘭房殘蠟照幢幢寂歷牆陰少吠龙涼月自生青玉案冷香不散綠紗牕蘼蕪山上春如夢蛺蝶花前影自雙學繡留僊裙六幅流蘇宛轉玉瑋琰

玉牀瑤簟枕文犀侍女添香理象篋爲愛遲眠愁聽雨偶

思閒步怕霑泥生綃花鳥圖誰贈麗句珊瑚筆慣題莫倚粧樓望春色陌頭楊柳正萋迷

醉時懽笑醒時嗔懊惱心情亦可人獨上樓臺愁盼遠每聽絲竹暗傷神名園北地新聲艷臣里東家故苑春生小浣紗溪畔住不須更學捧心顰

修竹天寒綠不肥腰肢瘦損六銖衣蓬門寂寂春將盡金線年年計總非秋草尙餘春草碧霜華還照露華晞何當借得鷓鴣風翼化作雲間彩鳳飛

習射行爲汪厚夫樞曹彥博作

古人六藝兼文武一藝能勤拙可補四方天地男兒心倏忽蛟龍變雲雨腐儒窮酸絕可哀面牆枯坐眉不開豈無

蘇轍詩集卷第四
雄心破犀兕坐困禿管埋蒿萊射策金門致上第惟君彩
筆干雲際奮袖風翻金僕姑出匣干將失精銳近聞
天子幸灤陽獵火旗紅塞草黃鷓鴣千羣迴馬磧騏驎五
色繞龍章單于臺下霜初曉都尉營前雪不掃飛鏃看追
駿馬蹄頭鷺已攫饑鷹爪六騶扈從列千官猿臂將軍老
據鞍君也書生有竒氣昂首顧盼天蒼寒幸逢四海戈鋌
靖禮射賓筵好以整子雲詞賦動公卿長楊羽獵才鋒騁
五陵裘馬鶯花春棄繻走踏京華塵吾將從君學作射生
手安能懷鉛握槩困苦衣食纏其身

連雨排悶有作柬汪樞曹

吳儂生長魚蛙鄉夢中怕見梅雨黃那知騎驢來到此中

宵避漏頻移床陰風蕭條晦白晝枕簟六月生虛涼宣南
坊口溢暴漲水勢城角爭低昂哀禽失侶避簷幕餓犬攫
食通鄰牆有時乍見月吐光霧鬢攪亂姮娥粧投壺玉女
指而笑殷雷倏起山之陽破屋打頭窺鼯鼠萬戶晨炊少
煙縷一身二鬴縱可飽誰爲災黎拯疾苦窮儒切抱杞人
憂搔首皇穹愧無補北方土燥愁滂沱江鄉奈此鴻雁何
黃河水強淮水弱倒灌勢欲翻天河具區東南接大海滄
溟翻浪驕鼉鼉附書江關滿涕淚風雨夜挾驚魂過杜陵
秋述客思多舊雨且共消愁魔茫茫身世集百感拔劍斫
地成狂歌

團扇曲

湘簾風細吹笙院團團明月澄於練疊雪裁成越紵衣招
涼製就齊紈扇齊紈團扇製玲瓏玉蘂雙魚紀漢宮香縷
細穿鸚鵡綠銀鈎斜點海棠紅北牕午睡消清晝一揮爽
氣生襟袖便疑身到廣寒宮半牀落葉吟詩瘦誰家怨女
倚粧樓反影旋娟動別愁羅袂夜涼宮漏永玉關信斷碧
天秋碧天無情冷香雨亞字欄前向花語紅牆待月撲流
螢返照霓裳羽衣舞別有文園善病人冰綃圓薄擁吟身
木芙蓉花碧桐樹十二金徽琴思新茂陵秋草斜陽暮誰
賜金莖一杯露宮門雉尾雲沉沉隔斷蟬紗幾重霧昔日
恩情暫棄捐底須辛苦互流連君不見石榴花開藕花放
沉香匣啟春雲鮮

錦帆曲養泉齋中分賦

蕪城焦土金粉香詩人懷古吟隋皇隋皇行宮翠雲帳麗
人歌船紅繡檣綵爲花繪爲樹呼韓醉卧長安路瓊花觀
吳淞臺邗溝傳報龍舟來吹竽笙擊鉦鼓左霓裳右雕羽
宮妃水嬉柘枝舞水面落紅濕香雨錦段帆衝錦浪新揚
州三月煙花春春風綠盡長堤草君王自笑頭顱好外間
知有人圖儂儂自揚帆明月中柁樓昭容粲玉齒停帆請
築丹陽宮江南錦繡春飛練河北旌旗夜傳箭紫泉城闕
雲低迷雕梁深鎖飛燕泥垂楊十里寒煙繞不見歸帆見
歸鳥雷塘腐艸遍飛螢影入南徐遠樹青南徐北固滄桑
收迷樓春去青山在吳孃翠袖舞迴波猶似蕭孃剪宮綵

君不見十幅蒲帆兩岍舟江濤終古茫茫流

和厚夫樞曹暑直四詠

冷布

曲池漚水三葛方格招涼半牕檻外窺人冉冉簾波對影
雙雙

涼篷

戶外一峰隱嶙牆頭四面周遮鄉夢扁舟沙岍蒲帆細雨
蘆花

冰槃

雪窖鑿開硯礪金莖捧出團圞滴水流珠不定彈琴覆手
生寒

櫻拂

掃却牙籤蟬蝨驅除几榻蠅蟲紫髯毵對我羽扇翩翩
伴君

同查梅史大令 揆 集飲張鹿樵舍人 大鏞 齋中

瓊毬燕臺客蕭條易水風十年身世感一夕酒杯中談笑
看捫蝨關山悵去鴻旅懷勞慰藉高誼有張融

同李蘅塘中允 錫恭 遊陶然亭登黑窰廠

客愁生遠道况值九秋時禿樹日昏晚一庵雲合離饗農
壇舍近 東去爲先農壇 陶旒土風宜蘆岍飛秋雪頓催鱸膾思

送汪樞曹扈獵木蘭

秋色滿關塞征車扈獵行天開三日霽月出萬山明詩思

馬頭起鄉心雲外生刀鑲唱燕市濁酒醉霜橙

厚夫樞曹自木蘭歸買菊補重九會席上賦贈

畫角清霜寒信到刀頭明月故人還重斟九日尊前酒同
話三秋塞上山鹿脯登盤噉燒尾席上有鹿尾菊花卷幔笑酡
顏紀游詩格沉雄甚朔漠風雲指顧間

冬日同厚夫樞曹圍爐聯句限十蒸韻

何以消寒夜汪彦博西牕共剪燈紅泥安竈後大黃葉閉門

仍簷瓦霜初覆彦博簾鈎月漸升鐘聲來遠寺大茗話得良

朋屋小同蟠螯彦博人情肖凍蠅鄉書鷗渚隔大宦轍駿臺

憑索米嘲方朔彦博思葦感季鷹酒腸澆未熟大詩骨峭生

稜宿火長留得彦博殘灰自撥會松明浮海客大芋熟住山

僧冷澹心情合彦博崢嶸歲月增閒忙身若寄大剝復氣相

乘炊黍還丹愧彦博吹葢往事懲一炊防炙手大並坐任橫

肱春滿臞儒樂彦博更闌倦僕憎今宵布被底大兩腳不成

冰彦博

厚夫樞曹攬鏡見白鬚一莖作歌自嘆余亦兩鬚

微斑感而賦此卽次其韻

霜華點額鬢鬢改不使春光少留待吟髭詩髻兩飄蕭對
影同看互談詒吾曹惟有詩興狂掀髯叩天訴真宰欲剪
蒼雪換紺螺長揖青蓮一千載笑傾天瓢醉瀝液恥向腥
厨乞醯醢髮神何爲不曉事那肯詩懷見汝餒况有百鍊
之還丹鬢鬢化作鬢雲采哀蒲細柳好護持野鶴青松自

常在會須晞髮陽之阿煙霧蒼茫跨東海道逢飛仙吳彩
鸞舉袂招邀不我免愚公之山移石成母使桑榆晚年悔
驚心潘髻漸如絲手酌酒卮屢承頰

華表鶴歌

遼關華表一鶴翔口吹天花仙語香白楊蕭蕭舊城郭落
月譙樓生冷光去家千年姓名古昔日紅顏盡黃土誰爲
將相誰王侯荒冢飛燐散秋雨寄語城邊挾彈兒人間陵
谷幾遷移冬青樹頭杜宇叫何不從余雲外飛

同汪樞曹和馬秋藥太常

履泰

抵掌吟

范蠡扁舟載西施游五湖留別文種

吳苑梧桐覆蘚苔舊時紅袖笑攜來祇應湖海藏春色不

礙江山少霸才侍女無心戀香徑故人何事醉文臺君恩
却在藏弓後聞道黃金鑄幾回

桃源送漁人出洞贈別

連朝釣艇泊溪旁花送君歸水亦香小住偶然談魏晉重
古恐又感滄桑客尋漁浦春常在山入雲林路易忘莫使
緣慳虛後約落紅門巷鎖斜陽

和汪樞曹祭詩行

汪倫積詩一千首邀我同斟祭詩酒以詩祭詩君詩成我
亦祭我真性情天風吹香散花雨空山詩鬼通神靈貧厨
愧之五侯味乞君分我虞棕羹莫嫌我家供具少鶴算糧
資枵腹飽但願年年昌我詩神其饗我酒一卮

己巳

燈市春遊詞同厚夫樞曹作

幡勝街樓點綴工鎖門了鳥綺羅叢西河沿接琉璃廠火

樹星球徹夜紅琉璃廠在西河沿南楊梅竹斜街西是燈市極盛處

鐵撥琵琶醉舞筵麩麩蟬髻壓花鈿自從環髻傳新製小

婦家家效阿錢毛西河姬人曼珠張姓小字阿錢豐臺賣花翁女也幼甚慧能效百鳥音縮髮作連

環名百環髻人多效之

春城游女踏紅綃可是羊家靜婉腰香水括萋剛洗去避

風猶戴髻邊貂京師女子冬日以括萋塗面春暖滌去不為風日所侵故潔白如玉查嗣琛詩春風

暖入肌膚滑初點胭脂洗括萋

廠西柳巷擁香篋細步蓮花渺若仙好趁金吾寬夜禁探

春遼御史墳邊

廠東有道御史大夫李內貞墓

花戶油牕絳蠟明

亮牕一名油牕以琉璃片繪畫人物花卉查嗣琛詩銀磨齋前重熾悔油牕花

戶過新年纖裙鳳子夜寒生消魂何處簾鈎響半是琉璃半水

晶

裁成羅綺四五幅費得金錢累幾緡火巷三條行未徧新

衣恐染軟紅塵

水調新翻夜度孃麝蘭香氣過紅牆儂家聽月樓頭住為

愛晚粧嬾曉粧

梁家園向東小樓舊名聽月樓毛西河有詩

咬春燕九集梨園十棒元宵羯鼓喧崑調居然小良輔教

師傳進景山門

景山內垣西北隅有房百餘間為蘇州梨園供奉所居

毬場逐隊去來頻歷落星暉漸向晨若使重逢倒喇戲燈

街猶有倚樓人倒喇金元戲劇名也此技國初時尚有之見矣之故竹垞初白俱有觀倒喇詩今則久未

鳳城雉堞聳巉巖坊巷雕甍七寶嵌綵帖宜春新第宅蠟糊紅紙署頭銜

新銜火判號龍圖赤雀牙旗左右扶當道儼然氣燄熱市

兒鼓掌笑挪揄街市以紙作人形燃炬其中名曰火判官

高結銅盤百丈繩七龍五鳳照層層珠絲編作太平字金

縷穿成 萬壽燈

同作

同里 汪彥博

金柑璀璨獻金門賜出黃羅拜 主恩夾道萬人看

詔下麥芽剛透五生盆

春場爭買土牛圖鼓打迎年百草蘇我亦要寬三日

假白鞞校尉放金吾

太平萬歲字穿燈浴出蠶池異樣綾細繞苑牆銀聞

響凌牀早泮一河冰

瓊島芙蓉水殿開春風遠后洗妝臺短鞞窄袖筵前

舞學得東丹射鹿回

法曲蛾兒舊樂工當年傳自玉熙宮一從頰老琵琶

歇北調于今迥不同

滿城貂鬣入年新七寶香奩勝裏人面洗括萋消盡

臘口含蘿蔔咬將春

白塔寺前遶塔去玉河橋畔走橋來商量後日尋春

伴嶽廟杏花開未開

豐臺輸與賣花翁
呪得花兒肉色紅
二十四番芳信外
別添一信試燈風

祈年觀外乳鶯黃
戲水金魚尺半長
祇許兩廂居樂

戶近以神樂觀附近居 蛄仙靜對老齋郎

烏蠻移市聚黃圖
鞞鞞珊瑚鬻五都
今日高句驪慕化
廠西購得異書無

花門春記月弦高
貢馬重添苜蓿槽
欲把一窠紅躑躅
換他十斛綠蒲萄

前輩風流翰墨場
新詞付與雪簫娘
何人解唱江南曲
不獨鍾情冒辟疆

座主何侍御茂軒先生招飲虎坊寓舍卽席奉和

原韻

軟繡街衢月皎然
隨班玉筍叙良緣
綺筵獻壽懽飛瓊

前三日爲先生誕辰珠市從游醉控鞭
馬鄭師門多勝侶
鶯花

帝里又新年
官梅東閣春風到
末座傳箋喜欲顛

歸家

已被青山笑重尋
白社吟花愁燕市
月酒盡客囊金獨夜
催鄉夢
閤身負壯心鳳城春
在望別思幾回深

津亭宿雨收曉色
上蘆溝
遠水聚人影
白雲生馬頭
柳嬌絲礙路
麥熟穗連疇
風物邨居好
關山愧浪遊

蘊愔閣詩集卷第四

蘊愔閣詩集卷第五

己巳

自都門歸泛舟訪虞山友人

鎮洋 盛大士 子履

青山如故人濶別積遐想良友如好山坐對愜欣賞三生
苔聚岑朋交海嶼廣樓筓郭隗臺侘際絆塵鞅悲筑破春
夢清謳動秋槩眠沙鷗狎水闖萍魚避網五兩候風駛未
到神已往停橈若愼愼躡屐倏悵惘恐以塵面觸翠微未
及上山人揖客笑謔詞叙疇曩招我登巉巖呼僮剪榛莽
層坳轉而折背俛面若仰四圍竦危架一角露平敞修眉
浮黛鬢峭骨洗剗磔石蹲夸娥肩劍劈巨靈掌海天雲瀾

漫日月共排盪眉眼豁夕翳襟裊挹晨爽或桐帽機鞵或
葛巾栗杖或縹緲練裙或蹠躡鶴擎胸列五嶽秀嶠岫闢
高朗沆瀣吞吐間神境忽恂恍豁厓瀉溜泉激激助清響

寒亭訪碑歌爲永州司馬李虎觀

邦燮賦有序

寒亭在湖南江華縣治南五里唐代宗時縣令瞿令問愛
其水石相勝求得洞穴棧險以登構亭巖際元次山刺道
州行部至縣遊其地作文記之瞿令問書磨崖亭背隸法
道逸元明以來以徑險遊者罕至碑文搨本流傳絕少吾
友長洲李虎觀司馬於嘉慶乙丑歲尋巖訪碑梯磴剔蘚
命工人何大權摹搨以歸誠希世墨寶也已巳歲余自都
門歸司馬亦奉諱家居出所藏石刻贈余余作長歌四百

二十言答贈司馬亦以誌余之幸云

零陵司馬李郡侯湖湘石碣窮微搽江華官廨清晝靜命
駕出郭寒亭遊高嶺樊縕峯挺萼飛宇奔溜崖懸抽亂石
壓磴踞白獸萬木交戟蹲碧蚪豁厓崩崩巨天際兩眼睜
貽神逗遛僉曰逕險不可上露卵獨御風颼颼都廣珍秘
闢潭與玉斧劖骨金窠鏤元漫叟文瞿令隸峭刻生動逸
且適風推霜剝一千載疑有神鬼潛陰麻竊塞蕭茹剪藤
葛碧雲削出千峯稠林菸蒼蔚瀉寒綠空青節角開球球
榛莽芟盡石骨露如割宿瘦刮蝨瘤磨厓承泰紀丙午片
石攷信珍瓊琇改元大歷十一月史筆確證廬陵歐元明
摹搨未及到守殘抱匱力不勦嗚呼古人不復作所賴文

字人間留周宣獵碣唐代顯秦詛楚出朝那湫順伯漁仲
互訓釋芸叟魯直精校讎石墨顯晦天數定總有元氣輝
千秋鼎鼎藥恣磨鍊蓄久必發沉必浮李侯今之趙德
甫金石著錄書錯揉仰取俯掇不少度物萃所好爭歸投
波斯大開百寶庫鐵網四面珊瑚收着手摩挲愛難割赫
蹠日輦六七郵寒亭訪碑紀游作較轆次山追柳州裝題
籤軸誇示我冷然高曠開塵眸恍登斯亭絕頂望炎暑不
到清而幽嗟余平生癖嗜古更愛枕石棲巖邱疑贖駭毳
少涉獵聞見壅障儒生羞惡思御李叩玉府躡景飛渡芙
蓉洲

古錢歌同黃茂才

廷鑑作

平生嗜古恥錢癖近搜古幣癖嗜錢誰其同志琴六子君
請聽我歌長篇幕義面帝創邃古九府利用蒼姬傳羸鎰
踵興鑄漸廣銖兩分寸平衡權歷朝紀元孝建始唐誌郡
邑標洪宣南北趙宋監局夥闐城貿易流百廩貯收綜覈
累千載蝨蝨蝕肉好全要其存者體質堅精銅百鍊光
黝然火燔水汨土液灌龍紋蠕動蟠連捲揚葩石蠅削翦
翠金螭紅射珊瑚鮮錢神賴汝呵護力疑有金橐牢關鍵
商彝夏鼎杳難溯積衍緡算長延延自來河山幾易姓不
與陵谷相推遷座中摩挲集珍秘二十二史同編年排列
世代燦列宿貫珠乙乙青絲穿分條析縷辨正閏綱目史
筆如杠椽正品偽品神異品當十當百或當千或篆或隸

或真草波磔體勢工雕鐫旁及壓勝并撒帳裝以寶匣裹
以緜有客問我誰購此歸載貨布辭幽燕旬積月累苦徵
索毋許細大少棄捐黃子過從時互易相與傾倒真珠船
君不見棧臺城陽散鉅萬嶙峋巖道高參天蠍蝮羣飛繞
金穴療貧吾輩無其緣嗚呼療貧吾輩終無緣何須戀却
阿堵物坐使百慮中焚煎世人愛錢吾愛古吾亦笑吾迂
且顛

海上

海上戈船瘴雨昏怒潮直欲撼乾坤青燐榕樹烽煙氣赤
色蘋花戰血痕楊僕尙能爲厲鬼孫恩何處脫游魂從今
水驛通舟楫免使東人賦籩殮

題李湘芷上舍

元壇

枯樹圖

瘦削營邱筆蘭成賦並工虬鱗摻螫蟻石髮碎蟠虹月白
霜潭外雲黃雪窖中自存生動意未許卧蒿蓬

舟行紀所見四首

廢寺

何代招提境頽雲罨薜蘿木魚梵唄少松鼠石龕多剩瓦
風霜剝傳燈歲月訛三生桑下宿筇竹記曾過

古冢

霜臯寒砭骨淒斷鮑家詩蹲獸斑凝石啼鴟血挂枝採樵
穿側逕捫字讀殘碑灑盡英雄淚臨風奠酒卮

荒園

水木仍明瑟誰人醉羽觴紅闌藏蜥蜴碧瓦散鴛鴦重覓
輿丁路空聞菜甲香歌臺春寂歷吟思落斜陽

野航

浮家煙水窟身世一沙鷗春雨綠楊岸秋風紅蓼洲遠村
時喚渡晚市每聞謳笑彼關津客危檣阻石尤

同作

長洲 李元塏

禪關終日閉黃葉短牆堆宿鳥自飛去晨鐘誰暗催
壇空今夜月香冷舊時灰倘得詩僧遇相期此地來
廢寺

枯樹不成陰寒雲宿艸深長流季子淚易老美人心
寂寞青燐火悲涼白鳥吟銜杯弔殘月桑落帶愁斟

古墓

紅樓拖半角疎柳尙青青人去鴟成夢風來鶴倦聽
苔深尋露卯花落護簾丁玉騎匆匆過相思幾度經
荒園

飄泊舟如屋閒鷗慣結鄰全家三兩口小住十年春
愛泛清波渡情深舊釣綸滄浪容我傲何必戀浮塵
野航

東彭甘亭上舍

兆蓀

海上丹霞飛僊人擁華蓋俯瞰八極小高摘獨星大舌吞
雙丸紅胸吐五雲靄當其乘長風咳唾落天外滄澥渺於
粟黃河狹於帶鮫宮斗量珠虬闕斛掬貝精光逼斗牛萬

怪不能害銀船挂練颿天空掃塵璫素娥鳴珠璫神斐獻
璫柰盛鬢不同制列坐盡少艾石蘭緝楊屋香蕙豔繁翻
縱橫元圃觴絡繹瑤池會妙采照殞絃大觀此焉最余亦
東海客神交遡范泰隔越風水渙落寞麗澤兌春明辭駿
臺秋浦戀鱸膾大雅孰較轢俗學逞狡獪啁啾釜鳴雷雜
還鼓動檐金精匿重淵沉沙必先汰陶鎔入洪鑪築冶惟
子賴

庚午

答寄汪侍御

彥博

青雲志氣壯致身苦不早我年屆四十鴛蹇老伏阜豈不
羨汗血恥作駒與駉總轡馳平原泛駕勿草草負哉古先
哲希聲蓄琛寶積寸乃得尺不達窮亦好來訊勵令猷積
誠爲傾倒隆誼愧孤負慚焉意如擣

四十自述

此日大可惜漸衰壯盛心名場老馳逐奇氣暗消沉隻影
愁臨鏡獨居防愧衾星河耿長夜特爲照清唵

銜恤終天恨劬勞莫報恩几筵感春露風木痛秋原舊宅
城南廢遺編硯北存林烏啼愴惻落日淚聲吞

浪跡隨萍梗華年瞥眼過關河歸雁少風雨酒人多蒼莽
哀箏氣飄零長鈇歌漸看兒女長向累又如何

塵海茫無岫閒身俯仰寬苦吟詩思進澹慮夢魂安流水
識所尚青山不厭看何須感遲暮絲竹動悲歡

白下懷李一元塏

尚湖明月好送客白門遊以我碧天夢思君紅葉秋江山
餘古蹟池館弔名流嘹唳南飛雁臨風起暮愁

九日招吳

卓信

黃

廷鑑

張

鐸

小集虞山北城之松

棚酒舍分韻賦詩余得仙字

登高不必上翠微飲酒不必開綺筵虞山北城重九會酒
龍詩虎皆神仙兩壺對斟盡三爵疾飛大觥鯨吸川清歌
隨風入層漢一鶴嘯破千林煙青山勸客酩酊醉我與公
等非少年酒醒秋風攪涼思霜花照眼寒更妍蒼松入雲
白日暮一綫露出紅霞鮮諸公欲歸且歸去我醉便從酒
舍眠

梨刀錢范歌

李生示我古錢范乃是王莽之梨刀徑廣五寸厚半寸其
中窈深四角高左列錢面右則幕裁制濶狹齊纖豪吾聞
攻金有六職築冶息桌段與桃又聞范金先合土搏埴之
工曰旄陶印泥覆范兩配合巧匠獨以精心操蘆灰梅黓
出青氣爐火爆焰流銅膏千年北邙瘞錢處漆鎧黯慘英
光韜蠟蝟蛻骨出人世隱現鱗甲蟠鯨鼇細紋空嵌紅間
碧叩之鏗爾戛玉璫惜乎此范僭偽物弔古今我心怱怱
哀平以降漢祚促黃牛白腹爭喧嘈三官赤仄變舊制大
泉壯布雜市曹梨刀一枋直五百吏民逐末恣饕餮盜鑄
嚴禁不得禁奸胥競挾銅炭逃水衡少府半耗竭饑鴻啄

粟哀磬磬貨泉竟應白水讖昆陽虎豹悲風號乃知刀泉
召殺氣不模不範徒爾勞

山居讀書四首柬李元壇暨其弟宗埴

鷓鴣栖宿處巢父得安居狹室審容膝深山足著書狂花
紅覆帳落葉翠飄裾十笏吟懷暢翛然塵跡踈

鎮日藜床對高譚有二丁嵐容千樹紫松影一鐙青破壁
搽殘帙豐碑搨舊銘巖扉鼓翠繞雲氣若爲扃

入山塵念澹日月靜中長一礪古琴漱六朝春草香精思
托豪素夾注雜丹黃有客籃輿到坳堂笑引觴

著作名山業煙霞氣味真道從高處仰人與古爲鄰暗谷
藏猿鶴虛堂嘯鬼神高歌發慷慨餘響入清泠

蕭子山茂才掄自金陵歸權枉過草堂卽送予之

虞山賦此留別

湖田人去日江岫客歸時舊約青雲伴新攜白下詩夕陽
窮遠目高柳縮離思後夜燈花落懷人酒一卮

張補葺孝廉景江來游虞山同吳頊儒卓信張椒

卿鐸孫少初茂才理酒樓夜飲

客爲看山到先來卽主人燭檠紅吐蘂酒盞綠浮鱗月色
澹將落湖光辨未真飛觴喧語笑醉舞不相嗔

澹僊曲有序

閩妓李澹僊色藝雙絕負重名而性孤介客有擲千金往
聘者落落不一當意琴溪蕭某游樵川一見輒相憐惜旣

而蕭將辭閩願委身焉蕭故貧纏頭之費不滿什之二三
悵然中止澹僊乃泣請曰妾薄命流落君又不能振拔之
妾願以小像屬君攜歸倩吳中諸名流題詠使知青樓朱
箔中有李澹僊其人者妾亦可以無憾矣嗚呼黃金欲鑄
神仙無速轉之丹青眼難逢鶯花有可憐之色能無悼韋
郎之玉簫泣秋娘之金縷也爰賦長歌以誌吾感

桃笙月冷芙蓉縟清瑟宵彈羽霓曲青衫紅袖兩傷心瑤
艸空階爲誰綠桃榔花發可憐春十里樵川漾翠鱗蓮葉
橫波迎畫舫楊枝夾道曳香塵金蟬鈿雀嬌羅綺日出城
南睡初起澹掃修眉合喚仙師師艷姓人傳李蕭郎閩海
憩吟鞭解珮傳觴玳瑁筵舊夢香丸情擾惱新盟玉杵話

纏綿皓齒明眸謝雕飾羣花睥睨無顏色鐵撥龍香孔翠
穿銀梭鴛縷流黃織青粉牆邊悵落暉腰肢瘦損六銖衣
願隨蕭史乘鳳去不共章臺柳絮飛吳艚越舫停蘭澤新
水桃花送歸客月影闌干燭影斜與郎共此銷魂夕了鳥
牕紗翡翠籠兜鞵情緒恨匆匆酒因泣別痕餘綠花爲傷
春色更紅離亭玉柱橫霑軾唱斷驪歌淚盈臆滄海難求
十斛珠青山恨少雙飛翼崔徽風貌妬花嬌應倩傳神盛
子昭裝就瓊花新樣錦倩郎珍重載歸橈但教尺幅青苔
紙賤妾才名備花史差勝鴛鴦冢上碑宿艸愁紅土花紫
一生憔悴爲情癡郎亦如儂失意時天涯海角憐知己秋
雨春風寫恨思簪挑翠縷同心釧手把紅羅定情扇鈿鏡

蘇轍詩集卷第五
九
粧階畫裏身伯勞飛燕時相見渺渺江潭起白蘋碧雲日
暮客愁新登樓王粲心情減不獨飄零泣美人

送吳門李布衣 邢熾之河南

李生不樂居江鄉飄然辭我遊洛陽愧無黃金贖遠別使
君行李生輝光贈君秦漢之瓦當長生未央母相忘贈君
喻麋之古墨上黨松心碧煙直君書行草體勢工君畫大
有元人風書記翩翩自矜許舉止談吐殊從容問年三十
尙未娶骨肉彫傲囊囊空困羈虞羅翦長翼不能冲飛逐
走蓬浮雲蔽天日色薄搔首我欲呼皇穹古驛霜楓肅秋
曉嘆君此行何草草黃河波浪險且惡滅沒鼉鼉亂青杏
君其愛此千金軀變幻風濤善自保銅雀荒涼鄴下臺梁

園詞賦老鄒枚名山少室鬱靈閼必有奇士埋荒萊願君
早賦歸去來與我挹衷滄江隈我將共君騎鯨散髮入東
海倒挾巨浪滄溟開

吳葵生茂才

景恩

將有洛下之行爲寫滄江載書

圖并贈以詩

葵生古之狂簡流不與俗士同好尙奇氣欲出不盡出累
蹶霜蹄膽更壯扁舟載書洛水濱欲尋少室山中人囊金
不滿十數兩百城高擁非爲貧船頭雪花大如掌寒坐孤
燈成獨往高歌半夜蛟龍驚水色天光共蒼莽飢鷹啄屋
鳥不飛君行千里將何爲荒雞啼曉不肯卧僮僕竊罵憎
書癡嗚呼世上未有如君癡安得洛陽復逢賈生輩懷抱

永此千秋期

璵兒初應州試作詩示之

吾昔五試童子場年二十一遊泮庠汝年十三爲文章今
歲州試初觀光攝衣直上刺史堂笑汝豪興凌青蒼歸檢
艸藁十數行瑕瑜姑置勿細詳趁暉弟妹牽衣裳爭索棗
脯搜竹筐燭花高檠飛赤芒汝侍飲酒立膝旁居吾語汝
汝勿忘食甘先以苦味嘗久久饜飫深而長當今

天子求賢良鮫綃億段玉尺量丹苞鳳藻翔華閭飛騰變
化爲汝望

寒夜飲吳頊儒齋中

江湖殘歲逼風雪破裘寒今我鬱不樂惟君愜所歡燭消

情話永月耐苦吟看激宕餘豪氣如何酒不乾

辛未

遊鹿城郎氏小園奉柬郎正叔丈

炳藜

負郭幽人宅空齋絕點塵閒雲鷗鳥夢明月薜蘿春砌蘚
綠圍座牆花紅笑人馬鞍延秀靄鎮日伴吟身
一徑列幽壑登臨勝事兼竹籬斜抱水石磴峭穿檐鶴愛
蕉邊立魚宜苻底潛催租人不到信手韻頻拈

郎芝田茂才

際昌

畫山水歌

畫山山從天外落畫水水自雲中來五百年間推巨手一
峰老人安在哉國初畫法元人肖太原司農擅神妙誰
尋其委窮其源鹿城近得郎士元橫皴側點作劈斧意趣

無窮出奇古丹青續就懸虛堂往往蛟龍吼風雨虛堂風
雨詫通靈聽之無聲似有聲真想自在筆墨外煙嵐杳杳
雲冥冥贈我霜綃一丈許碧山紅樹芙蓉渚有人開徑招
仙羣鎮日看雲兩無語我欲乘風學冲舉咫尺千山萬山
阻安得賣藥逢壺公跳身入此圖畫中重呼癡仙作仙友
醉倒瓊蘇百斛酒蓬萊絕頂崑崙巔解衣旁礴揮長箋空
青落手屏障濕寥天萬里驅雲煙

鹿城歸舟

綠楊隄畔木蘭橈劃破螺痕水一條細雨鶯聲啼不斷賣
花人過玉龍橋

張補葺孝廉以懷人詩冊寄示卽題其後

我無不好詣人癖豈不爾思奈遠何夜雨小樓燈下酒著
書應比昔年多

春日有懷海虞山中人

同里 張景江

傭書虞左近接琴河言念素交愛而不見得詩數章
聊寄停雲之思興到卽書興闌輒罷所懷固不盡屬
於此若夫山靈笑人諸君其爲我解焉

此來何事最情親一桁青山幾故人山隔重雲人不
見空教望斷水粼粼

我愛風流盛孝章記拈新句必同商而今閒却談詩

口莫道狂奴似舊狂

子履與余皆嚴於論詩嘗劇飲
酒樓兩人共論破詩家得失侃

侃而談四
座驚避

季重天生補史才酒酣以往氣如雷名山絕業編成

否副墨先期示我來

項儒嘗著三國補志余猶未及見也

依依爲問靈和柳妙詠風懷近若何我縱無才效官

體也思一聽懊儂歌

家椒卿詩最工側體又善以曼聲歌之

仙李蟠根正妙年倪寬蔣詡共周旋

謂湘芷亦魯秋漁

當時

被酒匆匆去衣上香痕尙宛然

前年冬余自虞山旋里已解維矣諸君又

要於路共往酒家大醉而別

探梅絕憶招真治

係蕭梁古治在西城山麓每梅花盛開時子履椒卿諸君無日不在

積雨終虛泛野航未免寒花笑人俗不將冰雪浣詩

腸

九日約黃琴六

廷鑑

遊北山爲風雨所阻次日造

訪不遇悵然成詩

盥輿有約過山莊楓漸飛丹菊漸黃但說今秋少風雨不

知明日是重陽

屋後遙山倚杖看一杯濁酒不成歡漁洋九日詩堪憶零

雨層城薄暮寒

遠近嵐光曉霽開綠雲一徑罨莓苔寒花笑客疎慵甚不

爲尋詩却不來

溪頭鷗鳥日聯羣遮莫緣慳我共君第六琴絃水清淺美

人咫尺阻重雲

移居四首

杜叟胸中厦能歡寒士顏我廬破風雨荒徑沒榛菅運甓

勤何補牽蘿計亦艱掉頭不肯住夢逐白雲還
問舍與求田此心殊澹然欲栖倦飛翼老我著書年凍蟄
春先到蝸牛骨亦仙一椽審容膝俯仰足安便
應門僮僕少居近市廛宜不厭塵囂溷欣將家具移月光
臨檻早花色上簾遲乞借鄰家壁樓邊築小窠
比戶居稠密行人雜沓過街前帘影合屋後屐聲多濁酒
沽來易新詩醉卽哦鸚哥橋畔月留客照顏酡

遣興五首

驚心白日堂堂去如許頭顱愧此身丹室無緣成大藥青
山有分作閒人早知嬾骨難諧俗豈怨儒冠不療貧十載
龍泉藏古匣夜寒霜月照常新

盧龍紫氣入雄關萬里風雲指顧間憶昔麻鞋來日下至
今詩夢落燕山空慚縞紵聯僑札豈有文章繼馬班客路
三千成底事不堪自照鏡中顏

一卷笙詩補未成夜蛩四壁助悲吟烏啼月落秋林薄馬
鬣霜封宿草深短髻無端增客感重泉何以慰親心遺編
不忍重開讀暗對孤燈淚滿襟

江鄉滿目渚鴻哀淮北河隄又告災已患流離盈卧路况
多風雨獨登臺防秋有 詔資籌畫輸粟頻年竭賦財華
省諸公來衮衮蒼生須仗濟時才

荒江歸卧掩荆扉讀易空齋得靜機座有煙雲供養好門
無車馬送迎稀山村老樹蒼逾瘦艸閣新寒綠不肥白紵

夜涼休便換窮簷九月嘆無衣

琴六齋中觀所藏古錢戲贈長句兼寄吳葵生

虞山誰家藏古錢吳君葵生暨黃子葵生搵索號繁富黃子癖嗜更無比紫檀沉香大小匣青紅縹碧燦斐几秦漢隸篆細鉤畫蝌蚪蜿蜒妙誰擬唐宋以來鼓鑄繁辨訛訂僞援圖史權量輕重別銖兩裁度厚薄析肌理中有雙龍與雙鯉隱約鱗紋徹表裏虬藤滴翠濕欲流凍蛟啄月寒不死不知何年乃鑄此贗者莫竊讒鼎似其餘異品紛錯糾亂縷美不勝屈指憶昔葵生購錢始余數愆憑互相市拔其尤者歸我橐自笑貪心不知止君之藏錢與我埒比似葵生則過矣余其備禦慎守寶戒勿棄置若脫屣恐君

兼并侈心起嗚呼君毋兼并侈心起

題郎正叔丈松泉清籟圖照

百泉撼萬松山靜異俗響凌虛落秋影夏籟盪塵想忽疑仙人來蹠躡曳鶴筆笑揖圖中人贈以叩竹杖飛泉不到處松心自孤往長嘯巖石顛詩懷浥秋爽

題郎芝田臨王石谷山靜日長圖長卷

畊煙散人不可作畫苑宗風嘆零落叢殘粉本爭臨摹結構雖工神氣薄今之健者郎士元胸中自具真邱壑偶臨長卷出示余吸取精華棄糟粕翠屏撐空削窈窕綠天永晝涵虛廓君言臨畫但臨意繩墨不被前賢縛不然衣冠類優孟坐使精神盡銷鑠亦猶作詩必此詩性靈何處重

開拓新豐雞犬識舊居尺寸錙銖細裁度匠門習氣乃若
此筆下那容少倚着自來名家善擬古離貌取神得秘鑰
君更變化神而明六法蠶叢手親鑿畫裏依稀太古春山
中大有琴書樂虛堂展翫移我情報以一詩免負諾

王叔畦孝廉

學浩

畫松林跌坐圖歌爲郎芝田作

兼柬椒畦

一人跌坐松林邊云是吾友郎芝田誰其圖者王孝廉意
致生動清而妍畫手應共芝田傳吾聞芝田畫松得松意
着意自在揮毫先此非畫史乃畫仙今之此圖妙相合二
妙未識誰尤賢龍鱗疊蒼翠虬幹蟠連蜷上有峩峩列岫
之遠靄下有淙淙瀉壑之飛泉置身其間萬慮捐洪厓浮

邱列左右相與挹袂同拍肩乃知畫境到神妙世上別開
一洞天余也煙霞抱清癖披君此圖喜且顛煩君呼我入
畫裏同坐松陰參畫禪

壬申

立夏日同琴六椒卿游石屋洞

清游訪石屋憶昔歲次甲僧臘換凡六覓徑尙了了層岡
蜀間嶧奧室深以窈危撐干仞墮清露一綫杳泐泉石竇
出四溢聚成沼溜聲琤琤鳴雲氣蠖螭繞陰晴變氣候不
辨昏與曉跌坐踞蹲石仰視碧天小更尋仄磴行別有招
提好密林間疎篁位置天然巧始悟曩日遊匆遽失搜討
出山日西沉一帆送歸鳥扣舷發高歌洗盞酌清醪何物

充飢腸餓餽雜餅麩無須櫻笋厨快看青山飽餞春興最
劇一詩紀鴻爪

玉蟹泉

石淙響漱玉泉穴狀如蟹探幽闕荒茸仄步學拄拐半筐
茗具移一束松柴買涓流郭索來微雨晴空灑斫雪塵滓
淨含黃沙礫擺香冽味自鮮心清渴先解一注亦競浥七
椀不能罷夕暉送歸客爽氣尙颯颯遠煙半嵐迷破籩一
燈矮歌聲出緯蕭咽彼老漁駭

示兒用昌黎韻

聖狂判氣質變化惟詩書所以古賢俊研經坐衡廬斗室
羅萬籍寸陰珍三餘衣不愛紈綺食豈厭菜蔬尙友百千

載晤對欣相於雨露厚培植高幹蟠根株春榮發藝圃灼
灼華英敷大塊和煦氣因材妙吹噓嗤彼樗與櫟頽散歸
荒區憶我少壯時自慚腹空虛開卷偶得益歌然不自居
年來患治生漸使故業疎幼慧劇憐汝問字牽我裾讀史
覽興廢出語驚壯夫搜羅近頗富博嗜兼熊魚學成出問
世淪落何足虞特恐慕奔競軒冕供歡娛轉笑窮巷子潛
修老繩樞試與辨道德跼蹐愧弗如泝流窮其源取精除
其麤名山大事業責任歸吾徒一簣進以漸六蔽當先祛
落落古傳人姓氏願與俱慎勿驚名利甘爲小人儒書紳
佩吾言勗旃慎厥初

秋夜新霽

溪閣重雲卷陂塘一水流衰荷羞見月高竹不驚秋遙夜
漏方半青山笛一樓短檠冰簟側涼意動新愁

瑣兒科試入泮詩以勗之

纔過成童歲翩然與泮遊文章初弄筆爽氣已凌秋學術
歸深造功名勿競求原泉來混混無本卽堪憂

漫成

星河耿耿霜月高宵闌四壁寒蟲號牀頭白酒乍開甕痛
飲何必求醇醪歲將暮矣百憂集對酒不作牛衣泣舌畔
薪水聊自給官吏催租幸勿及君不見鄰舍有門不敢開
悍胥街上咆哮來

丈夫年過四十姓氏無人曉五十垂垂牖下老杜陵許身
比稷契富貴難期致身早五陵衣馬美且都車騎雍容耀
紫衢白頭儒生曳短褐路鬼指顧羣挪揄嗚呼人生窮達
有定數吾身不怨儒冠誤

蘊愔閣詩集卷第五

蘊愔閣詩集卷第六

鎮洋 盛大士 子履

癸酉

春日有懷李司馬 邦燮 滇中

萬里昆明水四時花影嬌定多
新雨露為補舊風騷地僻
征徭簡時清瘴癘消無須戍
南詔禮樂化諸苗
吳門老名士蠻府舊叅軍
別我尊前酒孤吟山上雲
天涯遲驛使水渚失鷗羣
風雨眠餐慎滇民倚望殷

虞山官署呈何觀察茂軒先生

江南江北萬山青吳會重瞻使者星
觀察夫子於嘉慶地
庚申科典試江南
界滄瀛資水利天留元氣護生靈
餘糧栖畝衢謳洽里社

稱觥酒味馨猶恐雁羣噉渚澤夜深鈴閣夢頻醒
鵝鴿孤峯杖策登勝遊同上最高層吏名大隱希方朔人
羨羣仙御李膺朗抱白雲歸鐵笛醉飛紅葉落銀鐙七條
絃漱泠泠玉照徹壺中一片冰

璵兒省試余因偕至白下江中遇大風作歌示之
長江古稱天塹雄奔流直下滄澥東兩點金焦盪空碧俯
仰一氣青濛濛揚船擊楫舊游慣布帆不動心從容今我
攜汝復到此風景約畧當年同虞山買舟小於葉舟中四
面驚飛淙舟人膽大不曉事破浪竟欲乘長風黑雲如牆
壓江面有櫓不敢搖江中急借迴瀾傍絕壁怪石傑立劔
圓穹一篙力挽石背裂泮泮勢若撞洪鐘巨靈揚鬚老鼇

怒呼我共到馮夷宮篙師泅水拽巨索如引后羿千鈞弓
疾風忽隨柁背轉直以人力爭天工須臾風息泊江岍望
見鍾阜高低峰汝生未識波浪險驚魂甫定心忡忡我昔
扁舟過淮北淮河水挾黃河衝一葦竟渡若平地四面飛
瀑懸晴空澄心坐鎮憂懼釋此中大有凝神功世途險於
蜀道險康莊何處非蠶叢江山壯觀足千古閱歷亦足開
心胸醉成狂歌喝水立豪氣定欲吞虬龍

秣陵秋感

蒼茫煙樹秣陵城無限興亡弔古情紫蓋山川銷王氣白
門風雨攪秋聲新亭斷隴埋蕪碣舊苑荒臺冷玉笙垂柳
垂楊總蕭瑟傷心不獨庾蘭成

長板橋邊落木秋秦淮鳴咽使人愁青溪盪槩迷桃葉明月降幡照石頭社酒義熙郵舍改黨碑元祐姓名留朱樓大道誰家宅金粉消沉土一邱

珍珠河

在府學側相傳陳後主雨中泛舟宮人見浮漚呼以爲珍珠故名

春塘波綠鷗夢香風吹舞袖隨波翔蘭舟泛雨浪花濺美人翠羽鳴珠璫霧閣雲牕畫圖裏不辨臨春與結綺妾心愁送雨聲中水面珍珠拾不起珍珠河畔醉仙娥狎客新翻玉樹歌忽聽宮鴉啼夜雨胭脂井底淚珠多

洞神宮

在淮清橋西舊爲江總宅宋制使姚希得自蜀來建此奉清源梓潼白崖三神又名

蜀三大神廟

舊宅傳江總新宮祀洞神綵旛明照日玉樹暗傷春傑閣

翔鸞馭虛堂響鳳鈞椒蘭香案薦靈佑到西岷

烏衣巷

城南有烏衣園乃王謝故居其扁額曰來燕歲久傾圮

野徑泥深綠蘚肥巷名猶號舊烏衣疎籬一角茆亭古燕子秋銜夕照飛

白門雜咏

柳枝貼地帶疎痕點染秋光白下門丁字簾開人倚檻澹煙微雨總銷魂

碧紗燈影落銀河新製單衣翦越羅妾見莫愁湖上月秋來愁更比春多

渡口初停昨夜風橫波兩槳鬪玲瓏六朝多少傷心事盡在朱樓畫舫中

臨春複道燦流霞飛燕昭陽未許誇醉遣摩訶守江口玉
簫吹罷聽吹笳

半壁東南落日哀君王沉醉笑顏開長江自古天爲塹怪
底韓擒虎又來

戰鼓千山草木驚將軍橐甲厭談兵渡河獨有宗留守艸
檄青鎗血染成

名士歡場夢幻中歌殘瓊樹怨東風美人俠血千春碧不
爲桃花悵落紅

淒斷鴟絃不忍彈江袁門第惜春殘誰知花月春江夜開
府新朝已拜官

燕子樓頭燕壘空雨花臺畔雨濛濛愁心不逐秋潮落付

與江樓笛裏風

觀音閣秋眺用漁洋韻

高閣秋延雨後涼接天雲水浸微茫平林點筆圖蕭照小
市停舟問杜康石蘚翠餘庵徑外娑羅香落寺門旁夕陽
幕府山頭望兩岼蒹葭水一方

感事

野戍驚沙起荒原落木秋跳梁滋小醜傳箭說中州已悔
先機失難寬上將憂書生懷義憤荷戟願同仇

國法嚴貂寺會無尺寸權罹刑全不恤煽亂竟居先蟻賊
窺畿輔妖星逼斗躔乘墉紛豕突禍水起中涓

宮闕倉皇日天心默護持雷聲轟亂鏃電火掣妖旗義憤

人齊奮訛言勢絕危

鑿輿秋彌返臣庶釋驚疑

河北傳烽燧山東走檄書禍將憂蔓艸地已近淮徐白骨
烏銜肉青燈鬼嘯廬六師來日下父老望旌旗

黃邨邪孽殄滑邑寇氛清殺氣看初息頑根恐復萌燕齊
勞戍役楚蜀困輸征僕射能勤撫恩慈仰父兄

寰海歌清宴征輦夜不鳴論兵籌勝策防患在承平豈乏
賢司牧終慚負

聖明十行罪已

詔涕泣爲蒼生

甲戌

豫東紀事詩六十二韻余在兗州途次遇客從軍
中來者詳述山東河南邪匪之亂援筆誌其顛末
俾陳風者有所采焉

皇仁覆六合萬類歸陶甄食毛并踐土教養二百年蠢茲
不靖徒自外光華天姦民結私黨豫東連齊燕或倡瓦刀
社或搖虎尾鞭大者八卦教禍勢久蔓延惡林飛鴟鴞患
懲陰雨先願告守土臣義在豳風篇爲虺勿早摧爲蛇悔
徒然癸酉秋九月殺氣盈中原妖星三十丈上犯北斗躔
曹縣被蹂躪定陶空城捐河朔十數郡岌岌累卵懸強侯
殉滑邑慘殺吁可憐全家同死難膏血腥戈鋌天心佑忠
良幸得愛子全一城化蟲沙百里虛炊煙朱樓誰家宅隱

隱聞管絃推扉寂無人
髑髏狼藉眠門前
烏柏樹血染霜
花鮮屋後枯松枝
落月啼杜鵑
烽燧且四起
比戶無完廬
躑躅田間翁
白髮垂過肩
手攜兩弱穉
衣絮紛糾牽
黃口不肯走
驅之涕泗漣
鄉兵導前路
數里索百錢
無錢瞋目叱
中道傷扑顛
怒罵甘耐忍
尚恐飽老拳
死亡在呼吸
飢渴奚足言
忽報劉都轉
將令軍中宣
馬隊數百匹
弓箭腰間纏
精兵不貴多
一卒殺賊千
旌旗亂雲中
銳氣凌無前
走賊扈家集
剿賊大廟邊
轉戰九日夜
賊首絡繹傳
滑賊竄輝縣
根株斷猶連
困獸各死鬪
負嵎惡不悛
太行高嵯峨
賊欲巢其巔
桓桓楊提軍
修髯美而鬢
一麾躍萬馬
飛出雙龍泉
縱火焚其巢
飛礮衝其堅
風沙震屋瓦
鼓鼙助

喧闐鐵衣耀白雪
紅旗舞翩翾
戰歸宴將佐
玉帳開觴筵
劍花杯底落
弓月城頭圓
戎醜就俘馘

王師歌凱旋
草蟲賦嘒嘒
野蠋烝蝟蝟
難民始復甦
稍稍歸園田
面目慘鰲黑
肢體病跼蹐
頭上髮不櫛
身上衣無繻
入門眠妻子
卧席擁敗氈
尚疑夢中境
鬼物身爲緣
煮粥拾橡栗
和以艸根煎
性命喜再活
幸不溝壑填

詔書切撫卹
被兵租全蠲
陽春霑甘露
百卉滋芳妍
晴叵盪沴戾
陰陽平伏愆
上蒼仁愛心
轉移默有權
憑誰問牛喘
燮理無頗偏
霖雨救亢旱
舟楫濟巨川
欲報聖主聖
必藉賢臣賢
我言雖芻蕘
采之毋舍旃

髣山行

定陶城南殺氣驕定陶城北軍聲囂豺狼滿街攫人肉血
光直射蒼天高朝辭定陶城暮走髣山麓悲風蕭寥響羣
木徹夜干村萬村哭村民避賊攔路號路旁忽見官先逃
黃埃障天日色薄官遇賊兵官膽落不聞軍中戰鼓聲倏
化蟲沙與猿鶴吁嗟乎官死賊手官可憐民罹賊虐誰之
愆定陶城中十萬戶奈何倉猝全城捐

金鄉曲

深山毒藪潛鯢鯨羣醜計奪金鄉城金鄉邑令捕首逆鄰
境縱之不敢獲卽鹿入林不見幾逐虎負嵎又誰責黃花
九日金杯浮銜杯賞花城上樓暗躡城垣料了壯部署健
卒藏戈矛明晨戰鼓掀天震賊騎雖驕不敢進菊花無恙
笑顏開紅燭三更百壺醕城中既有備城外亦晏然市者
復居肆畊者仍歸田金鄉不逢賢守令生靈百萬何由全
君不見定曹闔境良家子血作城濠濠上水

蒲連歎

我讀老杜兵車行不信從軍古云樂賊兵蠶起官閉城惡
召鄉兵動村落蒲連張家十三子荷戟同仇誓同死淚眼
愁看白髮枯荒原瞥見黃塵起妻子別歧路不辨東與西
搖手掩口不敢哭問君幾日歸鉏犁男兒尸當裹馬革何
以家爲戀魂魄上有鬱鬱之高松下有青青之古柏蒲連
大寨賊乘虛一炬灰飛半天赤官兵漸集鄉兵歸歸來宅
破無半扉流離老幼鳥獸散存者僵凍無完衣聞道

皇仁免租賦 賜糧藉免今冬饑
黃昏仰看星月色 嗚咽磨刀誓殺賊

三賈謠

險莫薄扈家集危莫入曹
縣城居莫近蒲連寨走莫遇三賈
兵紅旗繽紛耀城市三賈村中無
賴子得錢能脫困獸阱無錢竟陷
良民死睚眦報復恩讎私十人九
人慄慄危蒲萄杯紅酒香冽此中
半是蒼生血血污遊魂無路歸冤
泉飛作炎天雪君不見炊煙墟里
鷄犬愁陰霾暗慘風颺颺銀牌高
挂者誰子朝烹肥羊夜宰牛

定陶捷

青天高懸大將星賊刃墮地賊膽
驚封狼豕抱頭竄戒不敢犯劉公
兵劉公十年老行陣據鞍顧盼威
風生公之作官不愛錢公之待民如
愛子身先將士習甘苦將士甘心
爲公死定陶城劉公來賊黨散城
門開飛鴻滿野嗷嗷哀白骨狼藉
薶荒萊傷心慘目有如此那堪攜
酒臨高臺噫嘻乎悲哉皇穹欲甦
爾民困得遇劉公死無恨

滑城哀

滑城九月鬼晝哭白狐跳梁烏啄
屋市人狂呼走避賊婦孺老羸亂
躑躅官符捕賊督官吏官吏先爲
賊奸細鞫訊先嚴首惡刑倉猝羣
兇肆毒計城樓高舉八卦旗箭飛
如雨合四圍慷慨握節縣官死碧
血夜逐青燐飛營兵竄伏不敢起
罵賊惟聞弱女子羅裙血染猩猩
紅常山之舌睢

陽齒嗚呼滑令死滑城亡醜類從此爭披猖滑城一日賊
未滅哭向皇天憤所切

道口歌

滑濬屯糧道口鎮西通太行達懷慶賊兵二萬同日進七
路官軍制其命聞道將軍幕府開巖關雪夜羽書催彎弓
盤馬不遽發

詔書譴怒如霆雷古稱需者事之賊况此小醜何足滅吳
宮王兌宮伯汝能爲鴟爲鴟爲鬼爲蠹乃褫汝魂魄擣汝
巢穴獨不見髯將軍挽鬚成結身先士卒歸來脫甲宴軍
門萬點猩紅戰袍血

司寨引

滑城賊鋒數摧敗鋌險西奔入司寨南湖賊目尤猖狂尅
日裹糧趨太行高峰插天一千丈絕壑悲風亂松響烈山
焚林拋火毬赤龍鱗甲飛寒湫裹創苦戰一日夜殺聲震
天天亦愁白土岡頭兵兩翼五雲照耀旌旗色官軍破道
口滑城之圍乃可合官軍破司寨滑城之賊乃可滅流民
亂後苦無家灑涕城南望城北

滕縣

井疆五十里到此獨徘徊渺爾彈丸邑曾逢命世才青山
拱鳧嶧喬木秀徂徠古廟蓬蒿沒愁聞鴻雁哀

東平道中流民歌

去年九月東昌府城頭烏啼月色苦今年二月東平州城

邊艸碧花光稠春花秋月年年度愁苦飄零向誰訴提挈
老幼飽風雨負擔牽衣不知數攀轅叩頭手索錢對我淚
下如流泉或從淮北來汙田數畝埋荒萊或從河南去弟
妹避兵在何處 朝廷有

詔開倉穀聞道官堂設官粥居民一飽尙不足那望流民
裹其腹

聖澤如天溥四海邑有流亡咎誰在使君大事不糊塗請
繪鄭俠流民圖

夜過汶上投宿郵舍寒甚不寐

天陰風色慘蒼莽陣雲屯漸近干戈地不成鷄犬村酒錢
寒易竭穀價貴難論擊斷城頭柝中宵驚客魂

任邱

任邱漢郡屬吾邱唐境漁陽接莫州古壘旌旗迷野色巖
關輦鼓入邊愁承平野叟耕黃犢辛苦征人嘆白頭南北
地形居險要蒼生幹濟賴持籌

燕南道中雜詠

二月燕南不見春曉寒飛雪送行人故鄉幾日鶯聲裏楊
柳堤邊艸又新

破寒夜酌酒盈卮馬上高吟夢裏詩何處鄉情消不得十
三橋畔月來時

東方故里客停鞍古井梧桐露正團臣朔也愁饑欲死長
安索米自來難

一
笑紅粧劍血痕
買絲爭欲繡平原
但求肝膽酬公子
便雪蛾眉地下冤

鷓鴣摩霄朔氣清
戍樓風急峭寒生
三更明月一聲笛
吹作幽燕變徵聲

王師去歲盪妖魔
徵調兵車喚渡河
馬上紅旗馬前雪
將軍醉唱凱旋歌

胭脂北地擅傾城
銀燭宵彈趙女箏
一自羽書徵戍役
玉簫聲是別離聲

冥濛煙靄鷺鷥汀
十里平沙水荇青
稍喜魚梁生意足
不愁在畱見三星

東阡南陌冷萋迷
啄粟愁聽黃鳥啼
剩有一畦霜後菜
免教此色到黔黎

白楊荒冢望蕭條
欲問巫咸賦大招
綠酒但澆墳上土
青燐不照舊時瓢

陌上車塵暮復朝
南鴻北雁路迢迢
征人若問春消息
莫遣東風過柳條

艸長鶯飛節候新
五年曾踏鳳城春
白雲自向山中宿
匹馬重關愧此身

東華門春望

縹緲瀛臺近春城
麗物華晴光九衢
樹花氣萬人家
聯珮趨仙闕和鈴響
鈿車流鶯聲宛轉
長願托林樞

曉過御溝

紫陌香車不動塵
禁煙時節艸成茵
御溝柳色濃如許
爲染龍池雨露深

醉步西郊

冶遊新試客衣單
落照城頭花半殘
已報河南烽火息
儘教春色醉中看

送李蘅塘侍講南歸

鶴俸無多不療貧
倚閭何忍累衰親
杜陵詩爲憂時作
李密書因將母陳
畧可洗愁惟綠酒
不堪望遠是緇塵
十年風雪貂裘敝
客路眠餐慎此身

張鹿樵侍讀席上卽事

月滿春城酒滿卮
如何醉月獨無詩
燭光搖几紫雲落
花

色上簾紅笑遲夜
雨江湖三載別故
人肝膽一時披
尊前不用看華髮
拔劍王郎氣自奇

都門旅舍屈敏山農部

廷鎮

過訪招余移寓高齋

卽事賦贈

穀貴攜貲少長安
不易居嬾隨塵海
逐轉與故人疎有
客久懸榻相逢笑
擘祛山中芳杜若
只合伴三閭

予自戊辰歲以詩質法時帆祭酒

式善

距今五載

重遊都下而先生已歸道山偶偕友人重過詩龕

愴然賦此

靈光魯殿沒青蕪
愴斷人琴淚眼枯
聞道憐才從古少
如公愛客近今無
十年朋舊埋衰艸
一代詩名滯宦途
師友

寢門齊慟哭不知大雅更誰扶

禮闈試罷下第南歸留別都中友人卽次畢子筠
孝廉送別韻

榆關風色不成春雀燕分飛我共君長劍今宵狂對酒短
衣明日愴離羣一鐙斷續還家夢半篋叢殘下第文去去
廣寧門外客不堪重盼鳳城雲

玉京縹緲路無緣便合牽蘿補舊屨錦段愧輸漆線巧良
媒恥蹈貿絲愆青山隔斷人天界白日閒拋壯盛年我去
吹簫君擊筑一生心事兩茫然

雕蟲詞賦忝微名潦倒崔瞻誤此生不解吹竽嗤抱瑟有
懷投筆學談兵春憐代北千花落夢逐天南一雁征齊豫

卽今銷戰甲不愁戎馬滯歸程

田園生計託汙萊草草勞人歸去來秋圃花宜香晚節春
風吹不到枯灰側身天地鷗羣散滿目關山雁侶哀辛苦
征塵磨瘦骨嬾登燕相舊時臺

過柳下惠墓

織蒲門下少蒲輪柳下依然古逸民潦倒一生遭三黜更
將直道事何人

一介三公志不移阨窮隨分樂恬怡隔村遠聽樵歌唱隴
上月明人靜時

舟泊清江浦次顧孝廉

時雷韻

但有同心樂不知行路難扁舟渡江浦客夢話平安野樹

綠圍屋雜花紅照灘願言賦招隱生計問漁竿

題畢季瑜孝廉憲會詩集

皎月出滄海蓬島闢清奧
銅陽老翁詩靈境咫尺到蒼寒
聳孤巉矯拔絕時好鈞韶金石鏗
冥搜神鬼告每於深邃
處勁氣獨排冑抗懷追風騷
盟壇樹幢燾千秋杜陵叟
前路雅輪導俗目混黑白那問
瞭與眊

題畢茂才緒珍遺稿兼柬季瑜丈

辛夷花發落翠稠綠卿仙去詩魂留
雲屏華燭照霞綵碧
天無聲銀漢流手抉天河出天表
凌風下瞰塵寰小天公
憐才非妬才丹詔特遣緋衣來
西河老人淚盈目且洗愁
腸醉醺醪君不見錦衣爛漫年
少子不賦玉樓賦金谷

九日王儕鶴表兄士麟招同畢季瑜彭甘亭集飲

借綠軒卽事

燕臺客嘆黃金盡歸臥滄江
百事慵詩思却從秋思起
酒人喜與故人逢一盞愁鬢
羞吹帽三徑寒花笑倚筇
借綠軒開話疇昔接離醉倒
叙懽悰

同作

同里 彭兆蓀

庭花黃映座鄰竹綠過牆
客老珍鄉味秋陰戀酒場
小詩黃泚秀大藥橘泉香
卽此成棲逸家風穩醉鄉

紀旱雜詩

焦巖無潤木枯淵有飛沙天瓢吝
勺瀝消渴尊斷汗南山
殷其靄黑雲散頽赧百家汲
一井井涸成廢窪得水競換

錢錢少不肯賒乾糗下咽難導以泥潦茶水溲索昂價晒
彼賣餅家

殘春屆秋初下隰土性燥桔槔村聲喧莫抹禾菽槁東邨
富家農昏夜召傭保西邨貧家子合作圖一飽邨後一小
車瞥見各驚擾大呼偷水賊追奔鹽其腦彼此怒奮臂亂
搏目幾眇明晨到訟庭曲直飾辨巧吏胥恣索錢逋債何
日了

巨港不容刀涓流細如髮烏銜老魚鱗馬踏死蛟骨露出
沒字碑乾封辨遺碣秦漢古吉金礪底或可掘伸手不敢
探恐驚毒龍窟文園疾不瘳昂首嘯明月

步出東郭門猝報潮汐至鄉農太鹵莽瀕海妄貪利掘開
塘亘丈穿鑿弄小智狂濤疾沸騰倏忽躍平地蚩氓愚無
知後患那能避倘觸罔象怒蛟窟走百魅颶風翻鼉身擊
浪鼓長翅哀汝鴻雁侶盡化魚鼈類

比塵揭紙旗旗綵颶青冥淋漓潑濃墨畫出蛟龍形道人
語半顛誇口符呪靈高臺蠹層霄擲水手不停一擲月皎
皎再擲星熒熒三擲水化酒天公醉難醒安得一瓢飲需
作靈雨零

斗米錢六百一家人數口搗碎糠荳餅百草雜和滲二甬
苦不給宿糧更何有攜兒鬻街市得錢供飯糗兒牽阿孃
衣驅之不肯走不忍加鞭笞掩淚執其手

皇仁霈鴻淋租賦十蠲五奸胥肆藐法利藪競餽取買荒

出白鏹一石二兩許天災分重輕顛倒恣弄侮秉燭夜達
晨細檢報荒簿某戶係某都某鏹係某戶珍珠與文綺隨
意市上賈

蘊懷閣詩集卷第六

